

Tawureta Munsa Lewi Serexedube Bonsɔɛ xa Seriye Masenyi nde yi Kitaabui xa fe ra

Alatala naxa a xa seriye masen a xa jama be Annabi Munsa saabui ra. Na seriye sebexi kitaabui suuli kui naxee birin nalanxi xili falama «Tawureta Munsa.» Isirayila foloxi ki naxe nun e biraxi seriye naxan foxo ra, na birin sebexi na kitaabuie nan kui.

«Lewi Serexedube bonsɔɛ xa Seriye» findixi kitaabui saxan nde nan na Tawureta Munsa kui. A sebexi mixie nan be naxee nu Ala xa wali rabama Isirayilakae ya ma. Na mixie findixi Lewi bonsɔɛ nan na. Lewi nu findixi Annabi Yaxuba xa di nde nan na. Ala nu bara yaamari fi a Lewi xa die xa findi salide walikɛe nun serexedube ra.

A nu lanma Ala xa wali xa raba a raba ki ma. Na kui Annabi Munsa naxa na birin sebe kitaabui kui alako diine yareratie nun Isirayila jama xa na seriye kolon, e xa bira na foxo ra. Fe gbegbe sebexi yi kitaabui kui serexee xa fe ra. Ala nu wama nee xa ba e ba ki ma. A man naxa wa adama xa jere seniyenyi kui, alo Ala nu wama a xon ma ki naxe a xa jama be. A yaamari wuyaxi fixi ne alako adama xa Ala waxonfe kolon.

To mixie noma lonni gbegbe tode yi kitaabui kui. Won xa a kolon Alatala mu yaamarie fixi

mixie ma fufafu. Xa Ala bara seriye nde so adama yi ra, a na rabaxi fe nde nan ma. Ala wama a xa mixie xa seniyeen barima a a kolon e heeri nan toma na kira seniyeenxi xon ma. Xa won bira Ala xa marasi foxo ra, won fe fanyi sotoma ne dunjina, won man a soto aligiyama. Ala xa won mali alako janige xa lu won boje kui, won xa dunjina igiri alo won Daa Marigi won nasixi ki naxe. Amina.

Tawureta Munsa Lewi Serexedube Bonsoe xa Seriye

Serexe gan daaxi

¹ Alatala naxa Annabi Munsa xili a xa horomolingira kui, a a masen a be,

² «A fala Isirayilakae be, naxan na wa serexe bafe n tan Alatala be, a xa xuruse lanma xa na mu a ra xuruse xungbe ba.

³ Xa a wama xuruse xungbe nan bafe serexe gan daaxi ra, fo a xa findi tuura ra lanyuru mu na naxan ma. A xa fa na ra n tan Alatala xa horomolingira sode de ra, alako n xa a tongo.

⁴ Serexeba xa a belexe sa xuruse xun tagi, alako n tan Alatala xa na serexe tongo, a xa findi a xunsare ra a xa yunubi xa fe ra.

⁵ Na tuura xa faxa n tan Alatala ya i. Haruna xa di serexedube xa fa na tuura wuli ra, e xa a kasan serexebade setie ma, serexebade naxan na n ma horomolingira sode de ra.

⁶ E xa tuura bura, e fa a isege.

⁷ Haruna xa di serexedubee xa yege radoxo, e te radexe.

⁸ E man xa serexe sube, a xunyi, nun a ture sa te i serexebade.

⁹ A furinge nun a sanyie xa raxa. Serexedube xa na birin gan serexebade. Serexe gan daaxi na a ra naxan xiri rafan n tan Alatala ma.»

¹⁰ «Xa mixi wama serexe gan daaxi bafe xuruse lanma ra, a xa findi yexee kontonyi ra, xa na mu a ra sikote, lanyuru mu na naxan ma.

¹¹ Serexeaba xa na kon naxaba serexebade koola mabiri n tan Alatala ya i. Haruna xa di serexedubee xa a wuli tongo, e xa a kasan serexebade seetie ma.

¹² E na ge sube ixabade, serexedube xa a sube, a xunyi, nun a ture sa te serexebade fari.

¹³ Serexeaba xa serexe furinge nun a sanyie raxa. Serexedube xa na birin gan serexebade. Serexe gan daaxi na a ra naxan xiri rafan n tan Alatala ma.»

¹⁴ «Xa a wama xoni bafe serexe gan daaxi ra n tan Alatala be, fo a xa findi kolokonde nan na, xa na mu a ra ganbe yore ra.

¹⁵ Serexedube xa fa a ra serexebade, a a xunyi bolon a de i, a a sa te, a a gan. A wuli xa ifili serexebade seetie ma.

¹⁶ A xa a geme booto ba, a a wole te i xube xun, serexebade sogetede mabiri ra.

¹⁷ Serexedube xa a suxu a gabutenyie ma, a a iboo. A xa a gan, a findi serexe gan daaxi ra, naxan xiri rafan n tan Alatala ma.»

2

Sansi xori serexe

¹ «Xa mixi wama serexe bafe n tan Alatala be naxan findixi sansi xori ra, a xa a luxuta a fanyi ra. A xa ture sa a fari, a surayi fan sa ture fari.

² A xa na so Haruna xa di serexedube yi ra. Serexedube nde xa sansi xori luxutaxi belexe ya keren ko, ture saxi naxan fari, a nun surayi, a xa a sa te i. Na xa gan n tan Alatala be, a xa findi tonxuma ra na serexe birin xa fe ra. Serexe gan daaxi na a ra naxan xiri rafa n tan Alatala ma.

³ Sansi xori luxutaxi naxan luxi naa findima Haruna nun a xa die nan gbe ra. A seniye n barima a baxi serexe ganxi nan na naxan baxi n tan Alatala be.»

⁴ «Xa mixi wama serexe bafe n tan Alatala be naxan findixi taami ganxi ra, a xa na yailan sansi xori luxutaxi ra lebini mu na naxan xun. Ture xa masunbu na fan na. Taami lebinitare xunxurie fan noma yailande, ture masoxi naxee ma.»

⁵ «Xa mixi wama serexe bafe naxan findixi taami gilixi ra, a xa na yailan sansi xori luxutaxi ra lebini mu na naxan xun. Ture xa masunbu na fan na.

⁶ A na ge gilinde, a xa igira, ture sa a ma, a xa findi serexe ra.»

⁷ «Xa mixi wama serexe bafe naxan findixi taami ra naxan ganxi tunde kui, a xa na yailan sansi xori luxutaxi nun ture ra.

⁸ A lanma mixi xa fa na serexe mooli ra n tan Alatala be. Xa na bara so serexedube yi ra, a na xaninma serexebade.

⁹ A xa nde tongo naxan findima tonxuma ra, a xa na gan serexebade fari, a xa findi serexe ra, naxan xiri rafa n tan Alatala ma.

¹⁰ Sansi xori dinxi naxan luxi a findima Haruna nun a xa die nan gbe ra. A seniye n barima a baxi

serexe ganxi nan na naxan baxi n tan Alatala be.»

¹¹ «Serexe naxan birin bama n tan Alatala be, lebini yo naxa lu a xun. A mu lan wo xa serexe gan daaxi yo ba n tan Alatala be lebini na naxan xun, xa na mu a ra kumi.

¹² Wo noma lebini nun kumi sade sansi bogi singee xun ma naxee bama serexe ra n tan Alatala be, kono e naxa gan serexebade fari.

¹³ Foxoe xa sa na serexe mooli birin ma, barima na bara findi saate tonxuma ra wo tan nun wo Marigi Ala tagi. Foxoe xa sa wo xa serexe birin ma.»

¹⁴ «Xa wo wama serexe bafe n tan Alatala be wo xa sansi bogi singe ra, wo xa tonsoe neene gan,

¹⁵ wo ture nun surayi sa a xun, a xa findi sansi bogi singe serexe ra.

¹⁶ Serexedube xa nde tongo na sansi xori, ture, nun surayi ra, na xa findi tonxuma ra. A xa na gan serexebade fari. A xa findi serexe ra, naxan xiri rafan n tan Alatala ma.»

3

Xanunteya serexe

¹ «Xa mixi wama xuruse xungbe bafe xanunteya serexe ra n tan Alatala be, xuruse xemema, xa na mu a ra ginema, a xa findi xuruse ra lanyuru yo mu na naxan ma.

² A xa a belexe sa na xuruse xun tagi n tan Ala xa horomolingira sode de ra, a a kon naxaba. Haruna xa di serexedubee xa na xuruse wuli kasan serexebade seeti ma.

³ Xanunteya serexe kui, a lanma ture naxan na furinge seeti ma, a xa gan te i n tan Alatala ya i,

4 a nun a gungui firinyi, e ture, nun laare naxan na a boɲe ma.

5 Haruna xa die xa na birin gan serexe gan daaxi xun ma, naxan na ganfe serexebade fari. A xa findi se xiri ɲoxunme ra n tan Alatala be.»

6 «Xa mixi wama xuruse lanma bafe xanunteya serexe ra n tan Alatala be, xuruse xemema, xa na mu a ra ginema, a xa findi xuruse ra lanyuru yo mu na naxan ma.

7 Xa mixi wama yexee bafe serexe ra, a xa na masen n tan Alatala be.

8 A xa a belexe sa a xun tagi, a fa a kon naxaba n tan Ala xa horomolingira sode de ra. Haruna xa di serexedubee xa na xuruse wuli kasan serexebade seetie ma.

9 Yi xanunteya serexe kui, a lanma a ture, a xuli, ture naxan na furinge seeti ma,

10 a gungui firinyi, e ture, nun laare naxan na a boɲe ma, na birin xa gan te i n tan Alatala ya i.

11 Serexedube xa na gan serexebade fari. Te xa na birin gan. Na bara findi serexe gan daaxi ra n tan Alatala be.»

12 «Xa mixi wama si bafe serexe ra, a xa na masen n tan Alatala be.

13 A xa a belexe sa a xun tagi, a fa a kon naxaba n tan Ala xa horomolingira sode de ra, Haruna xa di serexedubee xa na xuruse wuli kasan serexebade seetie ma.

14 Yi xanunteya serexe kui, a lanma a ture naxan na furinge seeti ma,

15 a gungui firinyi, e ture, nun laare naxan na a boɲe ma, na birin xa gan te i n tan Alatala ya i.

16 Serexedube xa na gan serexebade fari. Te xa na birin gan. Na bara findi serexe gan daaxi ra

n tan Alatala be naxan xiri rafan n ma.»

¹⁷ «Mixi yo naxa sube ture don, mixi yo naxa sube wuli min. Wo sabati dede, na bara findi yaamari ra naxan mu kanama abadan.»

4

Yunubi xafari serexe

¹ Alatala naxa a masen Annabi Munsa be,

² «A fala Isirayilakae be, xa mixi nde sa yunubi raba, konɔ a mu keli a janige ma, a xa bira yi seriyɛ foxo ra.

³ Xa serexedube kuntigi sa Ala xa yaamari nde matandi, na fa findi yunubi ra pama be, a lanma a xa tuura ba serexe ra n tan Alatala be, lanyuru mu na naxan ma, alako na xa findi yunubi xafari serexe ra a be.

⁴ A xa tuura xanin n tan Ala xa hɔrɔmɔlingira sode de ra n ya i, a a belexe sa a xun tagi, a fa a kon naxaba n tan Alatala ya i.

⁵ Serexedube kuntigi xa na tuura wuli xanin n ma hɔrɔmɔlingira kui,

⁶ a a belexesole ragoro na wuli xɔɔra, a a kasan sanya solofere dugi ya ra naxan gbakuxi yire seniyeɛnxi ma n tan Alatala ya i.

⁷ Serexedube xa wuli nde sa ferie ma naxee na surayi serexebade tunxunyi naani ra, naxan na n tan Alatala ya i n ma hɔrɔmɔlingira kui. Wuli naxan luxi, a xa na ifili serexe gan daaxi serexebade lanbanyi ma, naxan na n tan Alatala xa hɔrɔmɔlingira sode de ra.

⁸ A xa ture birin ba tuura ma naxan findixi yunubi xafari serexe ra, ture naxan na a furinge seeti ma,

⁹ a gungui firinyi, e ture, nun laare naxan na a boɲe ma.

¹⁰ A xa na raba alɔ xanunteya serexe rabama ki naxe. Serexedube xa na gan serexe gan daaxi serexebade fari.

¹¹ Kɔnɔ tuura kiri, a sube, a xunyi, a sanyie, a furinge, nun a ɲape,

¹² na tuura donxɔe birin xa xanin ɲama yonkinde fari ma, yire seniyenxi, te xube wɔlema dennaxe. Menni a xa gan te ra na te xube fari.»

¹³ «Xa Isirayila ɲama birin nan sa n tan Ala xa yaamari nde matandixi, kɔnɔ na mu keli e ɲanige ma, na findima yunubi ra e be.

¹⁴ E na fahaamui sɔtɔ na ma temui naxe, ɲama xa tuura yɔre ba serexe ra n tan Alatala be hɔrɔmɔlingira sode de ra naxan findima yunubi xafari serexe ra e be.

¹⁵ Nama forie xa e belexe sa tuura xun tagi n tan Alatala ya i, e a kɔn naxaba.

¹⁶ Serexedube kuntigi xa na tuura wuli xanin n tan Ala xa hɔrɔmɔlingira kui,

¹⁷ a a belexesole ragoro na wuli xɔɔra, a a kasan sanya solofere dugi ya ra naxan gbakuxi yire seniyenxi ma n tan Alatala ya i.

¹⁸ Serexedube xa wuli nde sa ferie ma naxee nu na serexebade tunxunyi naani ra, naxan na n tan Alatala ya i n ma hɔrɔmɔlingira kui. Wuli naxan luxi, a xa na ifili serexe gan daaxi serexebade lanbanyi ma, naxan na n ma hɔrɔmɔlingira sode de ra.

¹⁹ A xa ture birin ba tuura ma, a na gan serexebade fari.

²⁰ A xa yi tuura ba serexe ra alɔ naxan bama

yunubi xafari serexe ra. E ba ki birin keren. Na kui, serexedube serexe bama naxan findima e xunsare ra, alako e xa yunubie xa xafari.

²¹ A xa na tuura xanin pama yonkinde fari ma, a xa a gan alo boore tuura ganma ki naxe. Na findima yunubi xafari serexe nan na pama be.»

²² «Xa mange nde a Marigi Alatala xa yaamari nde matandi, konɔ na mu keli a panige ma, na findima yunubi ra a be.

²³ A na fahaamui soto na ma temui naxe, a xa sikote ba serexe ra, lanyuru mu na naxan ma.

²⁴ A xa a belexe sa sikote xun tagi ma n tan Alatala ya i, a a kon naxaba serexe gan daaxie kon naxabama dennaxe. Yunubi xafari serexe na a ra.

²⁵ Serexedube xa a belexesole ragoro na wuli xora naxan baxi yunubi xa fe ra, a nde sa ferie ma naxee na serexe gan daaxi serexebade tunxunyi naani ra. Wuli naxan luxi, a xa na ifili serexe gan daaxi serexebade lanbanyi ma.

²⁶ A xa na ture birin gan serexebade fari, alo xanunteya serexe rabama ki naxe. Na kui serexedube xunsare serexe bama mange be, alako a xa yunubi xa xafari.»

²⁷ «Xa mixi nde sa a Marigi Alatala xa yaamari nde matandi, konɔ na mu keli a panige ma, na findima yunubi ra a be.

²⁸ A na fahaamui soto na ma temui naxe, a xa si gine ba serexe ra, lanyuru mu na naxan ma, a xa yunubi xa fe ra.

²⁹ A xa a belexe sa na yunubi xafari serexe xun tagi, a a kon naxaba serexe gan daaxie kon naxabama dennaxe.

³⁰ Serexedube xa a belexesole ragoro na wuli xoorra naxan baxi yunubi xa fe ra, a nde sa ferie ma naxee na serexe gan daaxi serexebade tunxunyi naani ra. Wuli naxan luxi, a xa na ifili serexe gan daaxi serexebade lanbanyi ma.

³¹ A xa na ture birin ba si ma, alo xanunteya serexe rabama ki naxe, a na gan serexebade fari, a xa findi se xiri joxunme ra n tan Alatala be. Na kui serexedube xunsare serexe bama na mixi be, alako a xa yunubi xa xafari.»

³² «Xa a yexee bama yunubi xafari serexe ra, fo a xa findi yexee ginema lanyuru mu na naxan ma.

³³ A xa a belexe sa na yunubi xafari serexe xun tagi, a a kon naxaba serexe gan daaxie kon naxabama dennaxe.

³⁴ Serexedube xa a belexesole ragoro na wuli xoorra naxan baxi yunubi xafari serexe ra, a nde sa ferie ma naxee na serexe gan daaxi serexebade tunxunyi naani ra. Wuli naxan luxi, a xa na ifili serexe gan daaxi serexebade lanbanyi ma.

³⁵ A xa na ture birin ba yexee ma, alo xanunteya serexe rabama ki naxe, a xa na gan serexee fari naxee ganma serexebade fari. Na kui serexedube xunsare serexe bama na mixi be, alako a xa yunubi xa xafari.»

5

Yunubi ndee nun e xa serexee

¹ «Xa mixi nde sa a me e seedee xilima kiiti nde ma, konɔ a gundi seedeyaxi fe naxan ma a mu na fala pama be, na yunubi luma a xun ma.

² Xa mixi din se seniyantare ra a mu a kolon, alo sube raharamuxi binbi, xa na mu a ra xuruse seniyantare binbi, xa na mu a ra bubuse seniyantare binbi, na mixi fan findima ne mixi seniyantare ra, a yunubi soto na kui.

³ Xa mixi nde sa din se seniyantare ra naxan kelixi adamadi fate ma, a fa li a mu a kolon na temui, xa a sa a kolon temui naxe, a findima seniyantare ra, a yunubi sotoma na kui.

⁴ Xa mixi nde sa a kali fufafu, fe fanyi xa na mu a ra fe jaaxi ra, a fa neemu na ma, a na ratu na fe ma temui naxe, a findima seniyantare ra, a yunubi soto na kui.»

⁵ «Naxan na yunubi mooli rabama, a lanma a xa a ti na ra.

⁶ A xa yexee gine, xa na mu a ra si gine ba yete ragbilen serexe ra n tan Alatala be. Na kui serexedube yunubi xafari serexe bama a be, alako a xa yunubi xa xafari.»

⁷ «Xa feere mu na a yi ra na serexe xa fe ra, a xa kolokonde firin xa na mu a ra ganbe firin ba serexe ra n tan Alatala be. Keren xa findi yunubi xafari serexe ra, boore xa findi serexe gan daaxi ra.

⁸ A xa e xanin serexedube xon, serexedube xa yunubi xafari serexe nan singe ba. A xa a konyi gira, konso a naxa a xunyi ba a de i.

⁹ A a wuli nde kasanma serexebade seti ma, wuli naxan luxi, a na ifilima serexebade lanbanyi. Yunubi xafari serexe na a ra.

¹⁰ Serexedube xa na xoni firin nde ba serexe gan daaxi ra a raba ki ma. Na kui, serexedube xunsare serexe bama a be a xa yunubi rabaxi xa fe ra, alako a xa xafari.»

11 «Xa fεεre mu na a yi ra kolokonde firin, xa na mu a ra ganbe firin sɔtɔfe ra, a xa sansi xɔri dinxi konbo ya keren nun a tagi ba yunubi xafari serexe ra. A naxa ture, xa na mu a ra surayi sa na fari de, barima yunubi xafari serexe na a ra.

12 A xa na xanin serexedube xɔn ma, serexedube suxu keren ganma serexebade fari tonxuma ra. A na rabama serexee fari naxee ganma serexebade fari, barima yunubi xafari serexe na a ra.

13 Na kui serexedube xunsare serexe bama a be, alako a xa yunubi rabaxi xa xafari. Sansi xɔri dinxi naxan luxi a findima serexedube nan gbe ra.»

14 Alatala naxa a masen Annabi Munsa be,

15 «Xa mixi nde sa se nde tongo naxan findixi n tan Alatala gbe ra, kɔnɔ a mu a kolon a na yunubi mɔɔli rabaxi, a xa yexee kontonyi ba yete ragbilen serexe ra n tan Alatala be a xa yunubi xa fe ra. A mu lanma lanyuru yo xa lu na yexee ma, a sare fan xa lan sare ma naxan nawalima hɔrɔmɔlingira kui.

16 A xa na se tongoxi ragbilen serexedube ma, a man xa kɔbiri sa na fari. Na findima kɔbiri naxan na, a na se sare nan itaxunma dɔxɔ suuli ra, a fa dɔxɔ keren ba a ra, a na so serexedube yi ra. Na kui serexedube xunsare serexe bama a be sikote ra naxan findi yete ragbilen serexe ra, alako a xa yunubi xa xafari.

17 Mixi naxan yunubi rabama, a n tan Alatala xa yaamari nde matandi, hali a mu a kolon, na bara yunubi sɔtɔ, fo a xa na sare fi.

18 A lanma a xa sikote ba yete ragbilen serexe ra, lanyuru mu na naxan ma, naxan sare lanma

seriye ma. Na kui serexedube xunsare serexe bama a be a xa yunubi xa fe ra, a naxan nabaxi a mu a kolon, alako a xa yunubi xa xafari.

¹⁹ Na bara findi yete ragbilen serexe ra, barima a yunubi soto ne n tan Alatala ra.»

²⁰ Alatala naxa a masen Annabi Munsa be,

²¹ «Xa mixi nde sa yunubi soto, a fe jaaxi raba n tan Alatala ra, alo a ngaxakerenyi madaxufe se nde xa fe ra, naxan nu bara taxu a ra, xa na mu a ra a naxan muna, xa na mu a ra a naxan baxi a boore yi ra funmalaya ra,

²² xa na mu a ra se loxi a naxan toxi, a fa wule fala na xa fe ra kali ra,

²³ na yunubi raba mooli lanma a xa na se mupaxi ragbilen. Xa a mupaxi ne ba, xa a taxuxi ne a ra ba, xa se loxi na a ra a naxan toxi ba,

²⁴ xa se na a ra wule fala naxan ma fe ra kali ra, a xa na ragbilen a kanyi ma keren na, a man xa kobiri sa na fari. Na findima kobiri naxan na, a na se sare nan itaxunma doko suuli ra, a fa doko keren ba a ra, a na so na kanyi yi ra.

²⁵ A man xa yexee kontonyi xanin serexedube yire yete ragbilen serexe ra Alatala be. Fi yo naxa lu na yexee ma, a sare fan xa lan seriye ma.

²⁶ Na kui serexedube xunsare serexe bama a be n tan Alatala ya i, alako a xa yunubi, a naxan nabaxi, na xa xafari.»

6

Seriye serexedube be

Serexe gan daaxi seriye

¹ Alatala naxa a masen Annabi Munsa be,

² «Yi yaamari so Haruna nun a xa die yi ra: Seriyε nan ya serεxe gan daaxi xa fe ra. Serεxe gan daaxi xa lu serεxebade fari kεε ra, a xa gan han gεεsege.

³ Serexedube xa donma ragoro a ma, a xa wantanyi fiixe fanyi so a ra, a xa te xube ba serεxe gan daaxi bun ma, a a sa serεxebade seeti ma.

⁴ A na γε na wali ra, a xa a xa dugi fanyi ba a ma, a xa dugi gbete ragoro a ma, alako a xa na te xube xanin jama yonkinde fari ma, yire seniyenxi.

⁵ Te naxan dexexi serεxebade bun ma, na naxa xuben. Gεεsege birin serexedube xa yege radoxo, a xa te xuru, a serεxe gan daaxi sa na fari. A xanunteya serεxee ture fan ganma naa ne.

⁶ Na te dexema temui birin serεxebade bun ma, a mu xubenma.»

Sansi xori dinxi seriyε

⁷ «Seriye nan ya sansi xori dinxi serεxe xa fe ra. Haruna xa die xa fa na serεxe ra serεxebade n tan Alatala ya i.

⁸ Serexedube xa suxu keren ko sansi xori dinxi ra, a nun ture, a nun surayi naxan birin sama a fari, a xa na birin gan serεxe tonxuma ra serεxebade fari. Na xiri rafan n tan Alatala ma.

⁹ Naxan luxi, Haruna nun a xa die xa na don a lebinitare ra, hεromolingira tete seniyenxi kui.

¹⁰ A mu lanma a xa jin lebini ra, barima a fatanxi n ma serεxe gan daaxie nan na naxee seniyenxi han alo yunubi xafari serεxe nun yete ragbilen serεxe.

11 Haruna xa di xemee noma na donde. Yaamari na a ra wo bɔnsɔe be naxan mu kanama abadan. Mixi naxan birin a makɔrema na serexe gan daaxie ra naxee bama n tan Alatala be, na kanyie seniyeɓma ne.»

12 Alatala naxa a masen Annabi Munsa be,

13 «Haruna tima serexedube kuntigi ra loxoɔe naxe, a lanma a tan Haruna nun a xa die xa sansi xɔri fanyi dinxi konbo ya keren ba serexe ra. Na serexe tagi bama geesege, boore tagi bama nunmare. Na mooli xa raba mixi tima serexedube kuntigi ra temui naxe.

14 Yi sansi xɔri dinxi xa gilin tunde kui, ture xa sa a ma. A na jɔn, a xuntunyie xa gan te xɔra, a xa findi xiri jɔxunme ra Alatala be.

15 Serexedube naxan findima Haruna jɔxoɔe ra xa na serexe mooli ba. A xa raba na ki ne temui birin n tan Alatala ya i. Na serexe birin xa gan.

16 Serexedube xa serexe birin xa gan, e naxa na sese don.»

Yunubi xafari serexe seriye

17 Alatala naxa a masen Annabi Munsa be,

18 «Yi yaamari so Haruna nun a xa die yi ra: <Seriye nan ya yunubi xafari serexe xa fe ra. Yunubi xafari serexe kɔn naxabama serexe gan daaxi kɔn naxabade ne, barima se seniyeɓxi na a ra.

19 Serexedube naxan yunubi xafari serexe bama, a na donma n tan Ala xa hoɔromolingira tete seniyeɓxi nan kui.

20 Naxan yo dinma na serexe ra, na kanyie seniyeɓma ne. Xa na wuli sa kasan dugi nde ma, na dugi xa xa yire seniyeɓxi.

²¹ Xa na sube jinma tunde mooli nde kui naxan maniya feɓe ra, a na ge a jinde, na tunde xa kana. Xa a jinma tunde kui naxan yailanxi yoxui ra, na tunde xa maxa a fanyi ra ye ra.

²² Xeme serexedube birin xa na don, barima serexe seniyeɓi na a ra.

²³ Kono mixi yo naxa yunubi xafari serexe don, naxan wuli xaninma horomolingira kui xunsare ra. Na serexe mooli xa gan te ra.»

7

Yete ragbilen serexe seriye

¹ «Yete ragbilen serexe seriye nan ya: Serexe seniyeɓi na a ra.

² Yete ragbilen serexe kon naxabama serexe gan daaxi kon naxabade ne. A wuli xa kasan serexebade seeti ma.

³ A ture birin, a xuli, a ture naxan na a furinge seeti ma,

⁴ a gungui firinyi, e ture, nun laare naxan na a boɓe ma, na birin xa ba serexe ra.

⁵ Serexedube xa na birin gan serexebade fari serexe gan daaxi ra Alatala be. Yete ragbilen serexe na a ra.

⁶ Xeme serexedubee nan na donma yire seniyeɓi kui, barima serexe seniyeɓi na a ra.

⁷ Yunubi xafari serexe nun yete ragbilen serexe, e seriye birin keren. Serexedube naxan na xunsare serexe baxi, a tan nan na sube donma.

⁸ Serexe gan daaxi kiri fan luma serexedube yi ra naxan na baxi serexe ra.»

⁹ «Sansi xori dinxi serexe naxan ganxi nun naxan gilinxii, e fan findima serexedube nan gbe ra, naxan e baxi serexe ra.

¹⁰ Sansi xori dinxi serexe naxan mu ganxi, ture gbansan nan saxi a ma, xa na mu a ra ture mu saxi a ma, nee findima Haruna xa di birin nan gbe ra.»

Xanunteya serexe seriye

¹¹ «Xanunteya serexee seriye nan ya, naxan bama n tan Alatala be.

¹² Xa mixi nde wama tantui serexe bafe, a man xa taami lebinitaree yailan ture ra, a nun taami xunxurie ture saxi naxee ma, nun taami xunxuri naxee ramulanxi ture ra.

¹³ A na xanunteya serexe bama temui naxe, naxan findixi tantui serexe ra, a xa taami fan jin lebini na naxan xun.

¹⁴ Nde xa ba na taami mooli birin na, a findi serexedube gbe ra, naxan xanunteya serexe wuli kasanma serexebade setie ma.

¹⁵ Na xanunteya serexe sube donma a ba loxo ne, sese naxa lu han geesege.»

¹⁶ «Xa laayidi serexe bama, xa na mu a ra serexe janigexi, na sube xa don a ba loxo ne, kono xa nde sa lu a noma donde geesege fan.

¹⁷ Xa a donxo sa lu han na fan kuye iba, na sube xa gan gbiki na xi saxan nde loxo ma.

¹⁸ Xa mixi nde sa a yete xa xanunteya serexe sube don na xi saxan nde loxo ma, Ala mu a xa serexe tongoma. A luma alo a mu serexe yo baxi, barima na sube findixi se seniyentare nan na. Mixi naxan na rabama, a yunubi sotoma na kui.»

19 «Serexε sube naxan dinma se seniyentare ra, a mu lanma na sube xa don. Fo a xa gan nε gbiki. Mixi seniyenxi nan noma na xanunteya serexε sube donde,

20 kono seniyentare mu noma n tan Alatala xa xanunteya serexε donde, a ramanima nε Isirayila nama ya ma.

21 Mixi naxan a belexε dinma se seniyentare ra naxan kelixi adamadi ma, xa na mu a ra a belexε din sube seniyentare ra, xa na mu a ra se gbete naxan mu seniyenxi, xa na kanyi fa n tan Alatala xa xanunteya serexε don, a ramanima nε Isirayila nama ya ma.»

22 Alatala naxa a masen Annabi Munsa be,

23 «A fala Isirayilakae be, <Wo naxa ninge, yexεε, nun si ture don.

24 Wo noma xuruse ture rawalide alo wo wama a xon ma ki naxe xa a faxa a yete ma, xa na mu a ra sube xaape nde naxa a faxa, kono wo mu noma a donde.

25 Naxan yo ture donma, naxan noma rawalide serexε gan daaxi ra n tan Alatala be, na kanyi ramanima nε Isirayila nama ya ma.

26 Wo man mu lanma wo xa xoni wuli, xa na mu a ra xuruse wuli yo min yire birin wo na dennaxe.

27 Naxan yo wuli minma, na kanyi ramanima nε Isirayila nama ya ma.»»

28 Alatala naxa a masen Annabi Munsa be,

29 «A fala Isirayilakae be, <Naxan xanunteya serexε bama n tan Alatala be, a xa n tan Alatala gbe fi n ma.

30 A xa na xuruse ture nun a sisi xanin n tan Alatala yire alako a xa gan te ra n tan Alatala be.

A lanma a xa na xuruse sisi lintan n tan Alatala ya i a masenfe ra n be, na findixi n tan nan gbe ra.

³¹ Serexedube xa na ture gan serexebade fari. Na xuruse kanke luma Haruna nun a xa die nan be.

³² Wo xa xanunteya serexee kui, wo man xa xuruse yirefanyi tabe fi serexedube ma.

³³ Xuruse yirefanyi tabe xa findi serexedube nan gbe ra naxan bara wuli nun ture ba xanunteya serexe ra.

³⁴ N bara nate tongo naxan mu kanama abadan, Isirayilakae xa xanunteya serexee kui, e xuruse kanke naxan lintanxi n tan Ala ya i, a nun xuruse yirefanyi tabe e naxan baxi, na birin xa findi serexedube Haruna nun a xa die gbe ra.

³⁵ Kabi Haruna nun a xa die findi n tan Ala xa serexedubee ra, e na nan sotoma n tan Alatala xa serexe gan daaxie ya ma.

³⁶ E to findi serexedubee ra, n tan Alatala naxa na yaamari fi Isirayilakae ma. Yaamari na a ra naxan mu kanama abadan.»»

³⁷ Seriyε nan na ki serexee xa fe ra, serexe gan daaxi, sansi xori dinxi serexe, yunubi xafari serexe, yete ragbilen serexe, serexedube ti serexe, nun xanunteya serexe.

³⁸ Alatala nu bara na birin masen Annabi Munsa be Turusinina geya fari a to Isirayilakae yamari e xa fa serexee ra Turusinina gbengberenyi ma.

8

Serexedubee doxo serexe

¹ Alatala naxa a masen Annabi Munsa be,

² «Haruna nun a xa die xili hōrōmōlingira sode de ra. I xa fa e xa dugi seniyenxie ra, a nun ture seniyenxi, tuura naxan bama yunubi xafari serexe ra, yexee kontonyi firin, nun debe, taami lebinitaree na naxan kui.

³ I xa Isirayila pama birin malan hōrōmōlingira sode de ra.»

⁴ Annabi Munsa naxa Alatala xa yaamari rakamali, pama fan naxa e malan hōrōmōlingira sode de ra.

⁵ Annabi Munsa naxa a fala pama be, «Alatala bara n yamari n xa yi raba.»

⁶ Annabi Munsa naxa Haruna nun a xa die maso, a naxa e maxa ye ra.

⁷ A naxa dugi seniyenxie ragoro Haruna ma, a naxa a tagi xiri beleti ra, a guba ragoro a ma, a serexedube donma ragoro na fari, a a tagi xiri beleti ra.

⁸ A naxa kanke makotose ragoro a kon ma, a geme firin sa na kui naxee findixi Ala waxonfe masense ra.

⁹ A naxa xunmase doxo Haruna xunyi ma, a tonxuma seniyenxi xema daaxi sa na ma, alo Alatala Munsa yamari ki naxe.

¹⁰ Annabi Munsa naxa ture seniyenxi tongo, a nde maso Ala xa hōrōmōlingira ma, nun se naxan birin na a kui. A nee raseniyen na ki ne.

¹¹ A naxa ture kasan serexebade ma sanya solofere, a nun serexebade yirabasee, ye ragatade xungbe, nun na saxi se naxan fari, alako e xa seniyen.

¹² A man naxa ture nde sa Haruna xunyi ma, alako Haruna fan xa seniyen.

¹³ Annabi Munsa naxa Haruna xa die maso, a dugi seniyeŋxie ragoro e fan ma. A naxa e tagi nun e xunyi xiri dugi ra, alɔ Alatala a yamarixi ki naxe.

¹⁴ Annabi Munsa to fa tuura yunubi xafari serexe ra, Haruna nun a xa die naxa e belexee sa na tuura xun tagi.

¹⁵ Annabi Munsa naxa a kɔn naxaba, a naxa a wuli nde tongo, a a maso serexebade ferie ma naxee nu na serexebade tunxunyi naani ra. A naxa na raba a belexesole ra, alako a xa serexebade raseniyeŋ. A naxa wuli dɔnxɔe ifili serexebade seetie ma. A serexebade raseniyeŋ na ki ne barima a findi xunsarade nan na.

¹⁶ Annabi Munsa man naxa ture tongo naxan nu na ninge furinge rabilinyi, a nun laare naxan nu na a bɔŋe fari, nun a gungui xɔri firinyie nun e ture. A naxa nee birin sa te i serexebade fari.

¹⁷ Kɔnɔ a naxa tuura gundi, a kiri, a sube, nun a ɲaŋe gan te ra ɲama yonkinde fari ma, alɔ Alatala a yamarixi ki naxe.

¹⁸ Annabi Munsa naxa fa yeɣee kontonyi ra naxan findi serexe gan daaxi ra. Haruna nun a xa die naxa e belexee sa na yeɣee xun tagi.

¹⁹ Annabi Munsa naxa a kɔn naxaba, a a wuli nde kasan serexebade seetie ma.

²⁰ A naxa yeɣee ixaba a xuntunyie ra. A naxa a xunyi, a xuntunyie, nun a ture gan te i.

²¹ A naxa yeɣee furinge nun a sanyie raxa, a yeɣee kontonyi gundi birin gan te ra serexebade fari serexe gan daaxi ra, naxan xiri rafan Alatala ma. A na birin naba ne alɔ Alatala a yamarixi ki naxe.

²² Annabi Munsa naxa yexxe kontonyi firin nde tongo naxan findi serexedube dɔxo serexe ra. Haruna nun a xa die naxa e belexe sa na yexxe xun tagi.

²³ Annabi Munsa naxa a kon naxaba, a a wuli nde tongo, a a sa Haruna yirefanyi tuli ma, a yirefanyi belkekura ma, nun a sankura ma.

²⁴ A naxa Haruna xa die fan maso, a naxa wuli nde sa e yirefanyi tulie ma, e yirefanyi belkekura ma, nun e yirefanyi sankura ma. A naxa a wuli nde kasan serexebade seetie ma.

²⁵ A naxa na yexxe ture tongo, a nun a xuli, a furinge ture, laare naxan na a boje fari, a gungui xori firinyie nun e ture, nun a yirefanyi tabe.

²⁶ Annabi Munsa naxa debe tongo taami lebinitaree na naxan kui, naxan nu dɔxoxi Alatala ya i. A naxa taami lebinitare keren ba na, a nun taami keren naxan yailanxi ture ra, a nun taami lanmadi keren. A naxa e sa na yexxe ture nun a yirefanyi tabe fari.

²⁷ A naxa na birin so Haruna nun a xa die yi ra, e fa na lintan Alatala ya i alako a xa a kolon a gbe na a ra.

²⁸ Na dangi xanbi, Annabi Munsa naxa e rasuxu e yi ra, a naxa e sa te serexebade fari, serexe gan daaxi nu na dennaxe. Serexedube dɔxo serexe na a ra, naxan gan xiri rafan Alatala ma.

²⁹ Annabi Munsa naxa yexxe kontonyi kanke tongo na serexedube dɔxo serexe ra, a fa na lintan Alatala ya i a masenfe ra a be. Na naxa findi Annabi Munsa gbe ra alo Alatala a yamarixi ki naxe.

³⁰ Annabi Munsa naxa ture seniyeñxi nde tongo, a nun wuli nde naxan nu na serexebade fari, a naxa a kasan Haruna nun a xa dugie ma, a a kasan Haruna xa die nun e xa dugie fan ma, alako e tan nun e xa dugie birin xa seniyeñ.

³¹ Munsa naxa a fala Haruna nun a xa die be, «Wo sube jin hɔrɔmɔlingira sode de ra, wo xa a don mɛnni, a nun taami naxan na debe kui naxan findi serexedube dɔxɔ serexe ra. N bara yaamari fi, Haruna nun a xa die xa na don.

³² Taami nun sube naxan luxi, wo xa na dɔnxɔe gan.

³³ Wo naxa keli hɔrɔmɔlingira sode de ra xi solofere bun ma, han wo xa dɔnxɔe waxati kamalima temui naxe.

³⁴ Naxan nabaxi to, Alatala a yamarixi wo yunubi xunsare xa fe nan na.

³⁵ Na na a toxi, wo luma hɔrɔmɔlingira sode de ra xi solofere bun ma, kɔe nun yanyi, alɔ Alatala n yamarixi a ra ki naxe, alako wo naxa faxa.»

³⁶ Haruna nun a xa die naxa Alatala xa yaamari birin naba na ki a naxan masenxi e be Annabi Munsa saabui ra.

9

Serexedubee xa serexe singee

¹ Xi solomasaxan lɔxɔe, Annabi Munsa naxa Haruna nun a xa die, nun Isirayila forie xili.

² A naxa a masen Haruna be, «I xa serexe firin masen Alatala be, tuura di naxan findima yunubi xafari serexe ra, a nun yexee kontonyi naxan findima serexe gan daaxi ra, lanyuru mu na naxan ma.

³ I xa a fala Isirayilakae be, «Wo xa sikote keren ba yunubi xafari serexe ra. Wo xa tuura di nun yexee di naxee bara je keren soto, lanyuru mu na naxee ma, wo xa e ba serexe gan daaxi ra.

⁴ Wo xa tuura nun yexee kontonyi ba xanunteya serexe ra Alatala be. Wo xa taami fan ba serexe ra, ture sunbuxi naxan na. Wo xa na birin ba barima Alatala minima ne wo ma to.»

⁵ Nama naxa serexee xanin horomolingira sode de ra alo Annabi Munsa e yamarixi ki naxe. E birin naxa e makore horomolingira ra, e ti Alatala ya i.

⁶ Annabi Munsa naxa a masen e be, «Wo xa Alatala xa yaamari rabatu alako a xa a nore masen wo be.»

⁷ Annabi Munsa naxa a masen Haruna be, «I maso serexebade ra. I xa yunubi xafari serexe nun serexe gan daaxi ba xunsare ra i yete be, a nun jama be. I xa jama xa serexe fan ba e be xunsare ra alo Alatala a yamarixi ki naxe.»

⁸ Haruna to a maso serexebade ra, a naxa tuura di kon naxaba a yete yunubi xafari serexe ra.

⁹ A xa die naxa tuura wuli so a yi ra. A naxa a belexesole rasin wuli xora, a nde sa ferie ma naxee nu na serexebade tunxunyi naani ra. A naxa wuli donxoe ifili serexebade lanbanyi ma.

¹⁰ Xuruse ture, a gunguie, nun laare naxan na a boje ma, a naxa na birin gan serexebade fari yunubi xafari serexe ra alo Alatala Annabi Munsa yamarixi a ra ki naxe.

¹¹ Konso a naxa a sube nun a kiri gan jama yonkinde fari ma.

¹² Na dangi xanbi, Haruna naxa serexɛ gan daaxi kɔn naxaba. A xa die naxa na wuli so a yi ra, a fa a kasan serexɛbade sɛɛtie ma.

¹³ E naxa serexɛ xuntunyie nun a xunyi so a yi ra, a na birin gan serexɛbade fari.

¹⁴ A to gɛ a furingɛ nun a sanyie raxade, a naxa e gan e nun serexɛ gan daaxi ra serexɛbade fari.

¹⁵ Haruna gɛ xanbi na ra, a naxa pama xa sikote kɔn naxaba, a xa findi yunubi xafari serexɛ ra pama bɛ. A na raba nɛ alɔ a a singe raba ki naxɛ.

¹⁶ A naxa serexɛ gan daaxi ba a seriye ki ma.

¹⁷ A naxa sansi xɔri dinxi suxu keren gan serexɛbade fari serexɛ gan daaxi ba temui gɛɛsɛgɛ.

¹⁸ A naxa tuura nun yɛxɛɛ kontonyi kɔn naxaba xanunteya serexɛ ra pama bɛ. A xa die naxa na wuli so a yi, a a kasan serexɛbade sɛɛtie ma.

¹⁹ E naxa tuura nun yɛxɛɛ kontonyi ture tongo, naxan na e xuli nun e furingɛ mabiri, a nun e gunguie, a nun laare naxan na e bɔɔɛ ma,

²⁰ e naxa na birin sa sube kanke ma serexɛbade fari, e a birin gan.

²¹ Haruna naxa serexɛ subee kanke nun e yirefanyi tabe ite, a e lintan Alatala ya i a masenfe ra a bɛ, alɔ Annabi Munsa a yamarixi ki naxɛ.

²² Haruna naxa a belexɛ itala, a duba pama bɛ. A to yunubi xafari serexɛ, serexɛ gan daaxi, nun xanunteya serexɛ ba, a naxa goro kelife serexɛbade sɛɛtie ma.

²³ Annabi Munsa nun Haruna naxa so hɔrɔmɔlingira kui. E to mini, e naxa duba pama

be. Na temui Alatala xa nore naxa mini jama ma.

²⁴ Alatala naxa te ragoro serexebade fari, a serexe gan daaxi nun ture gan. Nama to na to, e naxa e xui ite seewe ra, e e felen boxi ma.

10

Haruna xa di firinyie

¹ Haruna xa di firinyie, Nadabo nun Abihu naxa surayi gansee tongo, e te sa e kui, e surayi gan Alatala ya i. Kono e mu na te tongo Ala xa seriyε ki ma.

² Na na a to, Alatala naxa te ragoro e ma, e faxa a xa hromolingira yire seniye nxi kui.

³ Annabi Munsa naxa a fala Haruna be, «Alatala wo rakolonxi ne yi ra, a to a fala, «Naxee makore n na, e xa a kolon n seniye n, jama xa n binya.» Haruna naxa dundu yen.

⁴ Annabi Munsa naxa Mikayeli nun Elisafan xili, Haruna baba xunya Yusiye li xa die. A naxa a fala e be, «Wo xa wo ngaxakerenyie furee xanin jama yonkinde fari ma, dennaxe makuya yire seniye nxi ra.»

⁵ E naxa e furee xanin jama yonkinde fari ma, alo Annabi Munsa e yamarixi ki naxe. E nu bara serexedube dugie lu e furee ma.

⁶ Annabi Munsa naxa a fala Haruna nun a xa die be, Eleyasari nun Itamari, «Wo naxa wo xunsexe rabejin, wo naxa wo xa dugie fan iboo. Wo naxa sese raba naxan noma sunnunyi masende yi mixie xa faxe xa fe ra, alako Alatala naxa xono jama ma, a wo fan faxa. Wo

ngaxakerenyi Isirayilakae tan nɔma sunnunde yi mixie xa fe ra Alatala naxee faxaxi tɛ ra.

⁷ Wo naxa keli Ala xa hɔrɔmɔlingira sode dɛ ra yi saxanyi, alako wo naxa faxa. Alatala xa mixi sugandixie nan wo tan na.» E naxa Annabi Munsa xa yaamari rabatu.

⁸ Alatala naxa a masen Haruna bɛ,

⁹ «Wo na so hɔrɔmɔlingira kui, wo naxa weni min. Wo naxa minse yo min naxan mixi siisima, xa na mu a ra wo faxama nɛ. Na sɛriyɛ mu kanama wo bɔnsɔɛ bɛ abadan.

¹⁰ Na nan a niyama wo nɔma Ala gbe nun adamadi gbe tagi rabade, sɛniyenyi nun sɛniyɛntarɛna.

¹¹ Na fan a niyama nɛ wo xa nɔ Isirayilakae xarande Alatala xa yaamarie ra, a naxee fixi e ma Annabi Munsa saabui ra.»

¹² Annabi Munsa naxa a fala Haruna nun a xa di dɔnxɔɛɛ bɛ, Eleyasari nun Itamari, «Sansi xɔri dinxi naxan baxi sɛrɛxɛ ra Alatala bɛ, kɔnɔ naxan birin mu ganxi tɛ ra, wo xa na don sɛrɛxɛbade fɛ ma. Wo naxa lɛbini sa a xun ma de, barima a sɛniyɛn.

¹³ Wo xa a don yire sɛniyɛnxi, barima a ganxi Alatala bɛ sɛrɛxɛ gan daaxie nan fɛ ma. Na findixi i gbe nun i xa die gbe nan na. Alatala sɛrɛxɛdubɛɛ yamarixi na nan na.

¹⁴ Wo man xa sɛrɛxɛ sube kanke nun tabe don yire sɛniyɛnxi nɛ, naxee bara lintan Ala ya i, a masenfe ra a bɛ. Nee findixi wo gbe nan na, i tan, i xa di xɛmɛɛ, nun i xa di ginɛɛ. Ala bara na yaamari fi Isirayilakae ma e xa xanunteya sɛrɛxɛɛ xa fe ra.

¹⁵ Ture naxan ganma yo, tabe naxan bama yo, nun kanke naxan lintanma yo, e xa na birin masen Alatala be, na fa findi i gbe nun i xa die gbe ra, alo Alatala a yamarixi ki naxe. Serixe na a ra naxan mu kanama abadan.»

¹⁶ Annabi Munsa to sikote xa fe maxorin, naxan ba yunubi xafari serexe ra, a naxa a me a e nu bara a birin gan te ra, a naxa xono Eleyasari nun Itamari ma, Haruna xa die naxee mu faxa. A naxa a fala e be,

¹⁷ «Munfe ra wo mu yi yunubi xafari serexe sube donxi yire seniyenxi? Serexe seniyenxi na a ra Alatala naxan fixi wo ma, alako Isirayila nama xa yunubi xa xafari, a findi xunsare ra e be Alatala ya i.

¹⁸ Yi serexe wuli to mu soxi yire seniyenxi ma horomolingira kui, a nu lan ne wo xa a sube don yire seniyenxi ne, alo Ala n yamarixi a ra ki naxe.»

¹⁹ Haruna naxa Annabi Munsa yaabi, «To e bara e xa yunubi xafari serexe nun e xa serexe gan daaxi ba Alatala ya i, kono n to bara yi fe xoxoxe molli soto, Alatala noma tinde n xa yunubi xafari serexe sube don to?»

²⁰ Annabi Munsa to na yaabi me, a naxa tin a ra.

11

Donse radaxaxi nun donse raharamuxi

¹ Alatala naxa a masen Annabi Munsa nun Haruna be,

² «Wo xa a fala Isirayilakae be, sube naxee radaxaxi wo be, nee nan ya:

³ Sube tore kanyie naxee tore itaxunxi firinyi ra, e man e xa donse ratema e de i e nu a idon. Wo noma na sube mooli donde.»

⁴ «Kono ndee na naxee donse ratema e de i e nu a idon, e tore tan mu itaxunxi firinyi ra. Nee raharamuxi wo ma. Noxome raharamuxi wo ma, barima a donse ratema a de i a nu a idon, kono a tore mu itaxunxi firinyi ra.

⁵ Yere maniyε nde fan donse ratema a de i a nu a idon, kono a tore mu itaxunxi firinyi ra. A raharamuxi wo ma.

⁶ Yere fan donse ratema a de i a nu a idon, kono a tore mu itaxunxi firinyi ra. A raharamuxi wo ma.

⁷ Xose tan, a tore itaxunxi firinyi ra, kono a mu donse ratema a de i a nu a idon. A raharamuxi wo ma.

⁸ Wo naxa na subee don, wo naxa din e binbie ra. E raharamuxi wo ma.»

⁹ «Yexe naxee na ye xora, wo noma naxee donde, nee nan ya: xale kanyi nun bele kanyi naxee na baa ma, xa na mu a ra xure kui.

¹⁰ Kono yexe naxee na baa ma, xa na mu a ra xure kui, bele mu na naxee ma, xa na mu a ra xale mu na naxee ma, e raharamuxi wo ma.

¹¹ E raharamuxi wo ma, wo naxa e sube don. E binbie fan raharamuxi wo ma.

¹² Yexe birin bele nun xale mu na naxee ma, e raharamuxi wo ma.»

¹³ «Xoni raharamuxie nan ya wo mu lan wo xa naxee don: yube, sege, xaruma gbontε,

¹⁴ a nun nee maniyε birin.

¹⁵ Xaaxa fan, wo naxa na don a nun a maniyε birin.

¹⁶ Xundi, kofole, a nun tagarantongoe,

17 wo naxa e don a nun nee maniyε birin.

18 Gbongboe, yedɔnmε,

19 laaba, tuxe, a nun nee maniyε birin, wo naxa e don.»

20 «Nimase gabutenyi nun sanyi na naxee ma, e raharamuxi wo ma.

21 Kɔnɔ na nimase mɔɔlie ya ma, naxee tunganma, wo nɔma nee tan donde,

22 alɔ katoe, tugumie, nun nee maniyε birin.

23 Kɔnɔ, nimase gabutenyi nun sanyi na naxee ma, e raharamuxi wo ma.»

24 «Xa wo dinma sube seniyantare ra, wo findima mixi seniyantare ra han nunmare ra.

25 Naxan e binbie maxaninma, na kanyi lan nε a xa a xa dugie xa, a man fa findi mixi seniyantare ra han nunmare ra. Fo a xa a xa dugie xa.

26 Sube naxee birin tore mu itaxunxi firinyi ra, a nun naxee donse donma, kɔnɔ a mu gbilenma a rate ra e dε i e nu a idon, nee raharamuxi wo ma. Naxan dinma na mɔɔli ra a findima mixi seniyantare ra.

27 Sube birin tore mu na naxee bε, e e jεrε e sanyi naanie xun na, e raharamuxi wo ma. Naxan dinma e binbie ra na findima mixi seniyantare ra han nunmare ra.

28 E raharamuxi wo ma. Naxan e binbie maxaninma, na kanyi lan nε a xa a xa dugie xa, a man fa findi mixi seniyantare ra han nunmare ra.»

29 «Nimase naxan birin luma yilie kui, e haramuxi wo bε. E xilie nan ya: bale, jεnε, kasa,

30 bonbolika, koolo, nun nee maniyεe.

³¹ Na nimase xunxuri moolie raharamuxi wo ma. Naxan dinma e binbie ra a findima mixi seniyantare ra han nunmare ra.

³² Xa e binbie sa bira se nde fari, na fan findima se seniyantare ra, alo se sa se wuri daaxi, dugi, xuruse kiri xaraxi, beki, xa na mu a ra yirabase nde. A lanma na se mooli xa sa ye xoorra han nunmare ra alako a xa seniyen.

³³ Xa na nimase mooli bira feɲe nde kui, feɲe nun a kui se birin findima se seniyantare ra. Na feɲe xa kana.

³⁴ Ye naxan nu na na feɲe kui, a na sa donse nde ma, na donse fan findima se seniyantare ra. Minse yo naxan nu na na feɲe kui, a fan findima se seniyantare ra.

³⁵ Xa na nimase mooli binbi bira se yo ma, na findima se seniyantare ra, alo taami ganse, xa na mu a ra tunde. E to findi se seniyantaree ra, a lanma wo xa e kana.

³⁶ Kooɲo xa e binbi sa bira dulonyi nan kui, xa na mu a ra ye ragatade nde, nee tan mu findima se seniyantaree ra. Kooɲo mixi naxan a belexe dinma e binbie ra, na findima mixi seniyantare ra.

³⁷ Xa a binbi bira sansi xori ma naxan sima, na mu findima se seniyantare ra.

³⁸ Kooɲo xa a binbi bira sansi xori tan ma naxan na ye xoorra, na sansi xori findima se seniyantare ra wo be.»

³⁹ «Xa xuruse radaxaxi nde faxa, mixi fa din a binbi ra, na kanyi findima seniyantare ra han nunmare ra.

⁴⁰ Naxan na a sube don, na kanyi lan ne a xa a xa dugie xa, a man fa findi seniyantare ra han

nunmare ra. Naxan na sube binbi maxanin, na kanyi lan ne a xa a xa dugie xa, a man fa findi seniyantare ra han nunmare ra.»

⁴¹ «Nimase naxan birin a bubuma boxi ma, nee birin raharamuxi wo ma. A mu lanma wo xa nee don.

⁴² Bubusee nun nimase xunxuri naxee jere ma e sanyi naani xun na, xa na mu a ra e sanyi wuyaxi xun na, e sese mu radaxaxi. Wo naxa e don.

⁴³ Wo naxa wo yete findi seniyantare ra na nimase mooli saabui ra. Wo naxa e don.

⁴⁴ Alatala nan n na, wo Marigi Ala. Wo xa wo yete fi n tan nan ma. Wo xa seniyen, barima n tan seniyen. Wo naxa wo yete findi seniyantare ra na nimase xunxuri saabui ra naxee luma jere ra boxi ma.»

⁴⁵ «N tan nan Alatala ra naxan wo raminixi Misira boxi ma, alako n xa findi wo Marigi Ala ra. Wo xa seniyen, barima n tan seniyen.

⁴⁶ Seriyε nan na ki subee, xonie, yexee, nun bubusee xa fe ra.

⁴⁷ Na kui wo noma sube seniyenxi nun sube seniyantare tagi raba kolonde, sube radaxaxi nun sube raharamuxi.»

12

Dingε xa serexε

¹ Alatala naxa a masen Annabi Munsa be,

² «A fala Isirayilakae be, xa gine nde sa tege, a di xeme bari, a findima seniyantare ra xi solofere bun ma, alo a kike walima temui naxe.

³ Xi solomasaxan loxoε, di xa sunna.

4 Na xi solofere xanbi, dinge luma seniyantarepa kui xi tongo saxan nun saxan bun ma a wuli xa fe ra naxan minixi a ma a di bari temui. A mu lanma a xa din se seniyenxi ra, a mu lanma a xa so yire seniyenxi kui han maraseniyeanyi waxati xa kamali.»

5 «Xa dinge di gine bari, a luma seniyantarepa kui loxoxun firin, alo a kike walima temui naxe. Na xanbi a xa maraseniyeanyi waxati buma xi tongo senni nun senni, a wuli xa fe ra naxan minixi a di bari temui.

6 A xa maraseniyeanyi waxati na kamali, di xeme, xa na mu a ra di gine xa fe ra, a xa yexee ne keren daaxi xanin serexedube xon ma hoxomolingira sode de ra. A xa na ba serexe gan daaxi ra. A man xa kolokonde yore, xa na mu a ra ganbe ba yunubi xafari serexe ra.

7 Serexedube xa na serexe ba Alatala be, a findi na gine xa xunsare ra. Na temui a seniyenma ne na wuli xa fe ra. Seriyen nan na ki gine be naxan di xeme barima, xa na mu a ra di gine.

8 Xa feere mu na a yi a xa yexee soto, a noma ganbe firin xaninde, xa na mu a ra kolokonde firin. Keren xa ba serexe gan daaxi ra, boore xa ba yunubi xafari serexe ra. Serexedube xa na ba, a findi xunsare ra gine be, a fa seniyen.»

13

Furee mixi fate ma

1 Alatala naxa a masen Annabi Munsa nun Haruna be,

² «Xa mixi fate kiri yire nde funtu, xa na mu a ra a fiixe, xa na mu a ra a findi fi ra, wo xa na kanyi xanin serexedube Haruna yire, xa na mu a ra a xa di nde yire.

³ Fure naxan na a fate, serexedube xa na mato. Xa fate xabe bara fiixe na fi yire, fi fan bara tilin, a sube li, fure jaaxi na a ra. Serexedube xa masenyi ti, na kanyi bara findi seniyantare ra.

⁴ Xa fure ya mu itilin a na kiri nan gbansan fari, fate xabe mu fiixexi na longori, serexedube xa furema yamari a xa lu a kerenyi ma loxoɔxun keren.

⁵ A xi solofere nde loxoɔɛ, serexedube man xa a mato. Xa a sa li fure mu na lantanfe, a man xa furema yamari a xa lu a kerenyi ma loxoɔxun keren.

⁶ A xi solofere nde loxoɔɛ, serexedube man xa a mato a sanmaya firin nde. Xa fure pingi bara masara, a man mu lantanfe, serexedube xa masenyi ti, na kanyi bara seniyen. Fure na a ra naxan mu jaaxu. A xa a xa dugie xa, a findi mixi seniyenxi ra.

⁷ Kono xa serexedube bara a mato, fure bara lantan ye na masenyi dangi xanbi, furema man xa gbilen serexedube yire temui gbete.

⁸ Serexedube man xa a mato. Xa fure bara lantan ye, serexedube xa masenyi ti, na kanyi bara findi seniyantare ra, fure jaaxi na a ra.»

⁹ «Xa fure jaaxi bara lu mixi nde kiri ma, e xa a xanin serexedube yire.

¹⁰ A xa a mato. Xa na mixi kiri bara fiixe yire nde, a fa funtu, fate xabe fan fa fiixe na longori, a bula, sube mini kene ma,

¹¹ fure jaaxi na a ra naxan mu dandanma. Serexedube xa masenyi ti, na kanyi bara findi mixi seniyantare ra. Hali a mu lu a kerenyi ma waxati di bun ma sɔnɔn, serexedube man xa a mato. Na tan bara ge findide mixi seniyantare ra.

¹² Xa serexedube bara a to a na fi jaaxi birin bara bari folo, naxan nu na furema fate ma, kelife a sanyie ma han a xunyi,

¹³ a xa masenyi ti, na kanyi bara seniyen, barima fi birin bara bari folo. A bara seniyen.

¹⁴ Kɔnɔ xa, fure sa bula, sube mini kene ma, na kanyi bara findi mixi seniyantare ra.

¹⁵ Serexedube na fure bulaxi to, a xa masenyi ti, fi bulaxi mu seniyen, fure jaaxi na a ra.

¹⁶ Xa sube bulaxi fa bari, furema xa siga serexedube yire.

¹⁷ A xa a mato. Xa fure bara bari, serexedube xa masenyi ti, furema bara seniyen.

¹⁸ Xa suuri mini mixi ma, a fa yalan,

¹⁹ kɔnɔ na kiri fa fiixe, xa na mu a ra a gbeeli, na kanyi xa siga serexedube yire.

²⁰ A xa a mato. Xa fure ya bara itilin, a sube li, fate xabe bara fiixe na longori, serexedube xa masenyi ti, na kanyi bara findi mixi seniyantare ra. Fure jaaxi na a ra, naxan minixi suuri foxi.

²¹ Xa serexedube mu fate xabe fiixe to, fi fan mu tilin, a mu sube lixi, a mu fiixe a gbe ra, furema xa lu a kerenyi ma loxoxun keren.

²² Xa fure bara lantan ye a fate ma, serexedube xa masenyi ti, na kanyi bara findi mixi seniyantare ra, fure jaaxi na a ra.

²³ Kɔnɔ xa fure mu masaraxi a mu lantanxi a

i, suuri barixi na a ra. Serexedube xa masenyi ti, na kanyi mixi seniyeŋxi na a ra.»

²⁴ «Xa mixi fate bara gan te ra temui dangixi, a kiri fa bari, kɔnɔ fure gbeeli, xa na mu a ra fure fiixe fa mini na foxi,

²⁵ serexedube xa na mato. Xa furema fate xabe bara fiixe na foxi, fure bara tilin, a sube li, fure jaaxi na a ra, naxan bara mini fate ma kiri dennaxe nu ganxi. Na serexedube xa masenyi ti, na kanyi bara findi mixi seniyeŋtare ra, barima fure jaaxi na a ra.

²⁶ Kɔnɔ xa serexedube mu fate xabe fiixe to fure ma, fi fan ya mu itilin, a mu sube lixi, a mu fiixe a gbe ra, serexedube xa na kanyi yamari a xa lu a kerenyi ma loxoɔun keren.

²⁷ Serexedube xa a mato xi solofere nde loxoɔe. Xa fure bara lantan ye a fate ma, serexedube xa masenyi ti, na kanyi bara findi mixi seniyeŋtare ra, fure jaaxi na a ra.

²⁸ Kɔnɔ xa fure mu masaraxi, a mu lantanxi a i, a mu fiixe alo a singe, a fatanxi na kiri ganxi nan na. Serexedube xa masenyi ti, na kanyi mixi seniyeŋxi na a ra. Nari na a ra kiri dennaxe gan.»

²⁹ «Xa fure lu xeme, xa na mu a ra gine xunyi ma, xa na mu a ra a kenkenyi ma,

³⁰ serexedube xa na fure mato. Xa fi ya bara itilin, a sube li, fate xabe fiixe, a xurun, serexedube xa masenyi ti, na kanyi bara findi mixi seniyeŋtare ra. Fure jaaxi na a ra naxan bara lu a xunyi ma, xa na mu a ra a kenkenyi ma.

³¹ Xa serexedube sa a to fure ya mu itilife, a mu sube life, fate xabe foore mu na, a xa furema yamari a xa lu a kerenyi ma xi solofere bun ma.

³² Serexedube xa na fure mato xi solofere nde loxoε. Xa fure mu lantanfe a i, fate xabe mu fiixe na longori, fi ya mu itilinxi, a mu sube lixi,

³³ na kanyi xa a xunsexe nun a dexabe bi a xa a ba fi ra. Serexedube man xa furema yamari a xa lu a kerenyi ma loxoxun keren.

³⁴ Serexedube xa na fure man mato xi solofere nde loxoε. Xa a mu lantanxi a i, a ya mu itilinxi, a mu sube lixi, serexedube xa masenyi ti, na kanyi mixi seniyenxi na a ra. A xa a xa dugie xa, a seniyen.

³⁵ Kono serexedube xa masenyi dangi xanbi, xa fure bara lantan ye furema fate ma,

³⁶ serexedube man xa a mato. Xa fure bara lantan ye, hali serexedube mu fate xabe fiixe fen. Na kanyi bara findi mixi seniyentare ra.

³⁷ Kono xa na fure mu lantanxi a i, fate xabe fōore nde tan bara mini, fure bara yalan. Na kanyi mixi seniyenxi na a ra. Serexedube xa masenyi ti, na kanyi mixi seniyenxi na a ra.»

³⁸ «Xa xeme, xa na mu a ra gine fate kiri bara fiixe yire ndee,

³⁹ serexedube xa na mato. Xa na mu fiixe a gbe ra, kasi mooli nde gbansan na a ra. A seniyen.»

⁴⁰ «Xa mixi nde xunsexe bara makon, terere kanyi na a ra, a mu jaaxu. Na kanyi seniyen.

⁴¹ Xa mixi nde xunsexe makonxi a tigi de biri gbansan ne, terere na a ra a mu jaaxu. Na kanyi seniyen.

⁴² Kono xa fure fiixe, xa na mu a ra fure gbeeli mini a xunyi ma, xa na mu a ra a tigi ma, fure jaaxi na a ra.

⁴³ Serexedube xa na mato. Xa na fure funtu naxan minixi a xunyi ma, a fiixe, xa na mu a ra a gbeeli alo fure jaaxi na ki naxe,

⁴⁴ furema na a ra, a mu seniyeñxi. Serexedube xa masenyi ti, na kanyi bara findi mixi seniyeñtare ra. Fure na a xunyi ma.»

⁴⁵ «Na fure jaaxi kanyi xa dugi ibooxi ragoro a ma, a xa a xunyi bi, a xa a de xabe makoto a belexe ra, a nu a fala a xui itexi ra <Seniyeñtare, Seniyeñtare.>

⁴⁶ Danmi na fure jaaxi na a ma, a mu seniyeñ. Fo a xa lu a kerenyi ma jama yonkinde fari ma.»

⁴⁷ «Na fure jaaxi noma lude dugi ma naxan yailanxi xuruse xabe ra, xa na mu a ra gese fute ra.

⁴⁸ A man noma lude se nde denbexi ma naxan yailanxi xuruse xabe ra, xa na mu a ra gese fute ra. A man noma lude se nde ma naxan yailanxi xuruse kiri ra.

⁴⁹ Xa na fure bara ifooro, xa na mu a ra a bara gbeeli dugi ma, kiri ma, xa na mu a ra se denbexi ma, fure jaaxi na a ra. A xa masen serexedube be, a xa na mato.

⁵⁰ Na fure na se naxan ma, na se xa ragata yire nde a kerenyi ma xi solofere bun ma.

⁵¹ Xi solofere nde loxo serexedube man xa a mato. Xa na fure bara lantan ye i na dugi ma, xa na mu a ra na se denbexi ma, xa na mu a ra na kiri ma, fure jaaxi na a ra. Na bara findi se seniyeñtare ra.

⁵² Serexedube xa se birin gan na fure na se naxan ma, dugi naxan yailanxi xuruse xabe ra, dugi naxan yailanxi gese fute ra, dugi denbexi, xa na mu a ra kiri.

⁵³ Kɔnɔ xa serexedube bara a mato, na fure mu lantanxi na see ma,

⁵⁴ a xa yaamari fi na see xa maxa ye ra, e xa sa e kerenyi ma xi solofere bun ma sanmaya firin nde.

⁵⁵ A na ge maxade, serexedube man xa na mato. Xa fure mu masaraxi, hali a man mu lantanxi a i, na findixi se seniyentare nan na. A birin xa gan te ra, hali fure na a lahale kerenyi gbansan nan ma.

⁵⁶ Xa serexedube bara a to fure mu fiixe alo singe, a xa na yire gbansan ba na.

⁵⁷ Kɔnɔ xa fure na lantanfe a i dugi ma, xa na mu a ra dugi denbexi ma, xa na mu a ra kiri ma, fure jaaxi na a ra, fo na xa gan te ra.

⁵⁸ Xa fure bara ba dugi ma, xa na mu a ra dugi denbexi ma, xa na mu a ra kiri ma ye ra a firin nde, a bara seniyen.»

⁵⁹ Seriyɛ nan na ki fure jaaxi xa fe ra naxan nɔma lude dugi nde ma naxan yailanxi xuruse xabe ra, xa na mu a ra gese fute ra, a nun dugi nde ma naxan denbexi, a nun kiri nde ma. Na seriyɛ nɔma a masende xa se nde seniyen, xa na mu a mu seniyen.

14

Furema seniyentare

¹ Alatala naxa a masen Annabi Munsa be,

² «Marasenyenyi lɔxɔɛ, fure jaaxi kanyi xa siga serexedube xɔn.

³ Serexedube xa siga nama yonkinde fari ma na furema matode. Xa a bara yalan,

⁴ serexedube xa yaamari fi, a xa fa xoni nipe radaxaxi firin na, e nun sediri wuri, gere mooli nde, nun hisopi wuri furema be.

⁵ Serexedube xa yaamari fi, e xa xoni keren kon naxaba feje nde xun ma, dulon ye na naxan kui.

⁶ A xa xoni nipe tongo, a nun sediri wuri, gere mooli nde, nun hisopi wuri, a xa e birin dukulu xoni wuli xora e naxan kon naxabaxi dulon ye xun ma.

⁷ A xa na kasan sanmaya solofere na furema ma, naxan lanma a xa seniyen. Serexedube xa masenyi ti, na mixi bara findi mixi seniyenxi ra. Na temui a xa xoni nipe bejin wula i.»

⁸ «Naxan wama seniyenfe, a xa a xa dugie xa, a xa a fate maxabe bi, a xa a maxa ye ra. Na kui, a seniyenma ne. Na dangi xanbi a noma sode nama yonkinde kui, kon a mu noma sode a xa kiri banxi tan kui xi solofere.

⁹ Xi solofere nde loxe, a man xa a xunsexe bi, a de xabe, a ya xinbi xabe, a nun a fate maxabe birin. A man xa a xa dugie xa, a xa a fate maxa. Na kui, a seniyenma ne.

¹⁰ Xi solomasaxan nde loxe, a xa yexeyore xemema firin tongo, a nun yexee ginema, je keren daaxi, lanyuru mu na naxee ma. A man xa sansi xori dinxi konbo ya keren nun a tagi soto, ture masunbuxi naxan na, a nun ture sigaati ya keren naxan findima serexe ra.

¹¹ Serexedube xa furema nun a xa serexe ti n tan Alatala ya i hromolingira sode de ra.

¹² A xa yexeyore keren tongo, a xa a ba yete ragbilen serexe ra, a nun ture sigaati ya keren. A xa nee lintan n tan Alatala ya i.

13 A xa na yexee kon naxaba yire seniyeñxi yunubi xafari serexe nun serexe gan daaxi bama dennaxe. Serexedube nan gbe yete ragbilen serexe nun yunubi xafari serexe ra. Serexe seniyeñxi nan e ra.

14 Serexedube xa yete ragbilen serexe wuli nde tongo, a xa a sa furema yirefanyi tuli ma, a belexekura yirefanyi ma, nun a sankura yirefanyi ma.

15 A man xa na ture sigaati ya keren ifili a yete koola belexe kui.

16 A xa a belexesole yirefanyi sin ture kui, a nu bara naxan sa a koola belexe kui, a xa na ture kasan doxo solofere n tan Alatala ya i.

17 Ture naxan luxi serexedube belexe kui, a xa nde sa furema yirefanyi tuli ma, a nun a belexekura yirefanyi ma, a nun a sankura yirefanyi ma yete ragbilen serexe wuli fari.

18 Ture donxoe naxan luxi serexedube yi ra, a xa na sa furema xunyi ma. Serexedube xa a xun sara n tan Alatala ya i.

19 Serexedube xa yunubi xafari serexe ba, a xa a xun sara a xa seniyeñtareja ma. Na dangi xanbi a xa na serexe gan daaxi kon naxaba.

20 A xa serexe gan daaxi nun sansi xori dinxi serexe ba serexebade fari. A xa furema xun sara alako a xa seniyeñ.»

21 «Xa setare nan na furema ra, feere mu na a yi na serexe xa fe ra, a xa yexeyore keren gbansan ba yete ragbilen serexe ra, naxan lintanma n tan Alatala ya i a xa findi furema xa xunsare ra. A xa sansi xori dinxi konbo ya tagi soto, ture masunbuxi naxan na, a nun ture

sigaaati ya keren,

²² nun ganbe firin, xa na mu a ra kolokonde yore firin. Keren xa findi yunubi xafari serexe ra, boore serexe gan daaxi.

²³ Xi solomasaxan nde loxoe, a xa fa na serexee ra serexedube xon horomolingira sode de ra n tan Alatala ya i, alako a xa seniyen.

²⁴ Serexedube xa yete ragbilen serexe yexee nun ture sigaaati ya keren lintan n tan Alatala ya i.

²⁵ A xa na yexeyore kon naxaba yete ragbilen serexe ra. A xa a wuli nde tongo, a xa na sa furema yirefanyi tuli ma, a yirefanyi belexekura ma, a nun a yirefanyi sankura ma.

²⁶ A xa ture nde ifili a yete koola belexe kui.

²⁷ A xa na ture kasan sanmaya solofere a belexesole yirefanyi ra n tan Alatala ya i.

²⁸ Ture naxan na a belexe kui, a xa dondoronti tongo, a na sa furema yirefanyi tuli ma, a yirefanyi belexekura ma, a nun a yirefanyi sankura ma wuli fari naxan keli yete ragbilen serexe ma.

²⁹ Ture naxan luxi a belexe kui, a xa na sa na furema xunyi ma, alako a xun xa sara n tan Alatala ya i.

³⁰ Serexedube xa ganbe keren ba, xa na mu a ra kolokonde yore, serexee ya ma furema naxee sotoxi.

³¹ A xa keren ba yunubi xafari serexe ra, boore xa findi serexe gan daaxi ra, a nun sansi xori dinxi. Serexedube furema xun sarama n tan Alatala ya i na ki ne.

³² Seriyen nan na ki maraseniyeanyi xa fe ra furemae be naxee findixi setaree ra.»

³³ Alatala naxa a masen Annabi Munsa nun Haruna be,

³⁴ «Wo na so Kanaan boxi ma, n naxan fima wo ma ke ra, xa fure jaaxi sa mini wo xa banxi kankee ma menni,

³⁵ banxi kanyi xa sa a fala serexedube be, <N bara fure jaaxi to n ma banxi ma.>

³⁶ Serexedube xa yaamari fi, e xa se birin namini banxi kui beenu a xa siga fure jaaxi matode, alako se naxan na banxi kui, na naxa findi se seniyentare ra. E na ge na rabade, serexedube xa siga na banxi matode.»

³⁷ «Serexedube xa na fure mato. Xa fure fooro, xa na mu a ra a gbeeli, a man ya naxa itilin, a banxi kanke suxu,

³⁸ serexedube xa mini banxi kui, a xa banxi naade balan loxun keren.

³⁹ Xi solofere nde loxoe, serexedube man xa gbilen naa. Xa fure bara lantan ye i banxi kanke ma,

⁴⁰ serexedube xa yaamari fi, banxi gemee xa ba na fure na dennaxe, e xa e wole taa fari ma yire seniyentare.

⁴¹ Banxi kanke xa maxoolin banxi kui. Naxan bama, na xa woli taa fari ma yire seniyentare.

⁴² Geme gbetee xa sa booree joxoe ra, banxi kanke xa maso a neene ra.»

⁴³ «Na wali birin dangi xanbi, xa fure jaaxi man mini banxi ma,

⁴⁴ serexedube xa gbilen na mato ra. Xa fure bara lantan ye banxi kui, fure jaaxi na a ra, a findixi se seniyentare nan na.

⁴⁵ Na banxi xa rabira, a gemee, a wurie, nun a maso bende birin xa wole taa fari ma yire

seniyentare.

⁴⁶ Naxan yo soma na banxi kui a balan xanbi, na kanyi fan findima mixi seniyentare nan na han nunmare ra.

⁴⁷ Naxan na a sa na banxi kui, xa na mu a ra a a dege naa, na lanma a xa a xa dugie xa.»

⁴⁸ «Na banxi yailan xanbi, xa serexedube sa gbilen na banxi kui, a fa a to fure mu lantanxi a i, a xa masenyi ti, na banxi bara seniyen, fure bara jon naa.

⁴⁹ Na banxi kanyi xa na marasenyenyi raka-mali serexe bafe ra. A xa xoni firin, sediri wuri, gere mooli nde, nun hisopi wuri soto.

⁵⁰ A xa xoni keren kon naxaba feje nde xun ma dulon ye na naxan kui.

⁵¹ A xa sediri wuri, hisopi wuri, gere mooli nde, nun xoni jipe sin xoni kon naxaba wuli xora, naxan na dulon ye kui. A xa a kasan banxi ma sanmaya solofere.

⁵² A xa banxi rasenyen xoni wuli, dulon ye, xoni jipe, sediri wuri, hisopi wuri, nun gere mooli nde ra.

⁵³ A xa xoni jipe bejin taa fari ma wula i. Na kui, na banxi xa fe jaaxi jonma ne, a seniyen.»

⁵⁴ «Seriye nan na ki fure jaaxie xa fe ra naxee minima mixi fate ma,

⁵⁵ dugie ma, banxie ma,

⁵⁶ naxee funtuma, naxee bulama, naxee fiixema,

⁵⁷ alako a xa kolon xa se seniyenxi nan a ra, xa na mu a ra a mu seniyenxi. Seriyen nan na ki na fure jaaxi xa fe ra.»

15

Korosila kanyi

nun gine xa kike wali

¹ Alatala naxa a masen Annabi Munsa nun Haruna be,

² «Wo xa a fala Isirayilakae be, korosila kanyi bara findi mixi seniyantare ra.

³ Korosila kanyi bara findi mixi seniyantare ra hali korosila mu na minife sinden, konɔ a na a fate kui.

⁴ Korosila kanyi sama sade naxan ma, se seniyantare na a ra. A doxo gonyi naxan yo ma, na fan se seniyantare na a ra.

⁵ Naxan na din a xa sade ra, na kanyi xa a xa dugie xa, a xa a yete maxa ye ra. A findima mixi seniyantare nan na han nummare ra.

⁶ Naxan doxoma a xa gonyi ma, na kanyi xa a xa dugie xa, a xa a yete maxa ye ra. A findima mixi seniyantare nan na han nummare ra.

⁷ Naxan yo din na furema fate ra, na kanyi xa a xa dugie xa, a xa a yete maxa ye ra. A findima mixi seniyantare nan na han nummare ra.

⁸ Xa furema de ye boxun mixi seniyanxi nde ma, na kanyi xa a xa dugie xa, a xa a yete maxa. A findima mixi seniyantare nan na han nummare ra.

⁹ Doxide naxan sama soe ma, xa na mu a ra joxome ma, xa furema doxo na fari, na doxide findima se seniyantare nan na.

¹⁰ Naxan na din sese ra furema bara doxo naxan fari, na kanyi bara findi mixi seniyantare ra han nummare ra. Na kanyi xa a xa dugie xa, a xa a yete maxa.

11 Furema belexe seniyyentare kanyi dinma mixi naxan na, na xa a xa dugie xa, a xa a yete maxa ye ra. A findima mixi seniyyentare nan na han nunmare ra.

12 Furema dinma feye naxan na, na xa kana. Xa yirabase wuri daaxi na a ra, a lan a xa maxa ye ra.»

13 «Korosila kanyi na yalan, a mame tima ne loxun keren beenu a xa findi mixi seniyyenxi ra. A xa a xa dugie xa, a xa a maxa dulonyi ye ra. A seniyyenma na ki ne.

14 Xi solomasaxan nde loxo, a xa ganbe firin tongo, xa na mu a ra kolokonde yore firin, a sa e so serexedube yi ra n tan Alatala ya i hromolingira sode de ra.

15 Serexedube xa xoni keren ba yunubi xafari serexe ra, boore serexe gan daaxi. Na kui, korosila kanyi bara a xun sara n tan Alatala ya i.»

16 «Xa xeme nde a xa wantanyi noxo, a xa a fate birin maxa. A findima mixi seniyyentare nan na han nunmare ra.

17 Dugi nun kiri naxan birin noxo, e xa maxa ye ra, e fan findima ne se seniyyentare han nunmare ra.

18 Xa xeme nun gine kafu e boore ra, e xa e fate maxa. E findima mixi seniyyentaree nan na han nunmare ra.»

19 «Gine naxan na a xa kike wali kui, a findima mixi seniyyentare nan na loxun keren bun ma. Naxan na din a ra, a fan findima mixi seniyyentare ra han nunmare ra.

20 Gine naxan na a xa kike wali kui, a sama sade naxan ma, se seniyyentare na a ra. A doxo

sese naxan ma, na fan se seniyyentare na a ra.

²¹ Naxan yo na din a xa sade ra, na kanyi xa a xa dugie xa, a xa a yete maxa ye ra. A findima mixi seniyyentare nan na han nunmare ra.

²² Naxan yo na dɔxɔ a xa gonyi ma, na kanyi xa a xa dugie xa, a xa a yete maxa ye ra. A findima mixi seniyyentare nan na han nunmare ra.

²³ Xa se nde saxi na sade ma, xa na mu a ra na gonyi ma a nu dɔxɔxi naxan ma, naxan dinma na se ra a findima mixi seniyyentare nan na han nunmare ra.

²⁴ Xa xeme nde nun na gine kafu, a xa kike wali wuli fa sa a fate ma, a fan findima mixi seniyyentare nan na lɔxɔxun keren bun ma. A na sa sade yo ma, na fan findima se seniyyentare nan na.»

²⁵ «Xa wuli lu mini ra gine ma, naxan mu findixi a xa kike wali wuli ra, xa na mu a ra a xa kike wali temui xɔn naxa kuya, a findima mixi seniyyentare nan na alɔ gine naxan na a xa kike wali kui.

²⁶ A na a sa sade naxan ma, xa na mu a ra a dɔxɔ gonyi naxan ma, na birin findima ne se seniyyentare ra alɔ a xa kike wali temui.

²⁷ Naxan dinma na see ra, na kanyi xa a xa dugie xa, a xa a fate maxa ye ra. A findima mixi seniyyentare nan na han nunmare ra.»

²⁸ «Wuli na ba minife, na gine xa mame ti lɔxɔxun keren, a fa seniyyen.

²⁹ Xi solofere nde lɔxɔe, a xa ganbe firin, xa na mu a ra kolokonde yɔre firin tongo, a xa e xanin serexedube xɔn hɔrɔmɔlingira sode de ra.

³⁰ Serexedube xa xɔni keren ba yunubi xafari serexe ra, boore serexe gan daaxi. Serexedube

xunsare serexe bama na gine be n tan Alatala ya i na ki ne.»

³¹ «Wo xa Isirayilakae makuya seniyentarepa ra, xa na mu a ra, e na e makore n ma horomolingira ra naxan na wo tagi, e faxama ne.»

³² «Seriye nan na ki korosila xa fe ra, a nun xeme naxan a xa wantanyi noxoma,

³³ gine naxan na kike wali kui, korosila naxan minima xeme nun gine fate i, nun xeme naxan nun gine seniyentare kafuma.»

16

Xunsare loxe

¹ Haruna xa di firinyi to faxa e yete masenfe ra Alatala be, Alatala naxa a masen Annabi Munsa be,

² «A fala i taara Haruna be, a na so horomolingira kui, a naxa lu dangi ra dugi gbakuxi ra xa a dangi temui mu a lixi, alako a naxa faxa. Yire seniyenxi na a ra saate kankira na dennaxe. Xunsarade na na saate kankira nan fari, n minima nuxui kui dennaxe.»

³ «Haruna xa so horomolingira kui tuura ra, naxan bama yunubi xafari serexe ra, a nun yexee kontonyi serexe gan daaxi ra.

⁴ A xa guba seniyenxi gese fute daaxi ragoro a ma, a xa wantanyi gese fute daaxi so. A xa a tagi ixiri beleti gese fute daaxi ra, a xa xunmase doxo a xunyi ma. A na ge a maxade, a xa na dugi seniyenxi birin nagoro a ma.

⁵ Isirayila jama xa sikote firin so a yi ra yunubi xafari serexe ra, a nun yexee kontonyi keren serexe gan daaxi ra.

⁶ Haruna xa tuura ba a yete xa yunubi xafari serexe ra alako a tan nun a xa denbaya xun xa sara.

⁷ A xa na sikote firinyi ti n tan Alatala ya i, hōromolingira sode de ra.

⁸ A xa n tan Ala maxandi a xa tonxuma masen n be na sikote firinyi xa fe ra. Keren xa findi n tan Alatala gbe ra, boore xa lu Sentane be wula i.

⁹ Sikote naxan sugandixi n tan Alatala gbe ra, Haruna xa a ba yunubi xafari serexe ra.

¹⁰ Sikote naxan sugandixi a xa findi Sentane gbe ra, na mu faxama. Haruna xa a ti n tan Alatala ya i, a xa findi xunsare ra, a xa a bepin sigafe ra wula i Sentane be.

¹¹ Haruna xa tuura ba a yete xa yunubi xafari serexe ra, a xa findi a tan nun a xa denbaya xunsare ra. A xa na tuura kon naxaba yunubi xafari serexe ra.

¹² A xa surayi ganse rafe te wole ra naxan tongoxi serexebade fari n tan Alatala ya i. A xa surayi fupi belexe ya firin fan tongo. A xa na birin xanin dugi gbakuxi xanbi ra yire seniyeñxi kui.

¹³ A xa na surayi gan n tan Alatala ya i, alako tuuri naxan tema na xa saate kankira noxon a ma alako a naxa faxa.

¹⁴ A xa tuura wuli nde tongo a belexesole ra, a xa a kasan saate kankira makoto se ma xunsarade sogetede biri sanmaya solofere, a man xa a kasan na makoto se ya ra.

15 A xa sikote kon naxaba jama xa yunubi xafari serexe ra, a fa a wuli xanin dugi gbakuxi xanbi ra. A xa na wuli kasan saate kankira makoto se ma nun saate kankira makoto se ya ra, alo a rabaxi tuura wuli ra ki naxe.»

16 «Na ki a xunsare sotoma yire seniyeñxi be Isirayilakae xa seniyeñtareña, e xa fe kobie, nun e xa yunubie xa fe ra. A xa a raba na ki hõromõlingira fan be, naxan tixi Isirayilaka seniyeñtaree tagi.

17 Mixi yo naxa lu hõromõlingira kui han Haruna minima yire seniyeñxi fisamante kui temui naxe. A xa a tan nun a xa denbaya xun sara, a nun Isirayila jama birin.

18 A xa siga serexebade yire naxan na n tan Alatala ya i, a fa xunsare ba na serexebade be. A xa tuura nun sikote wuli sa ferie ma naxee nu na serexebade tunxunyi naanie ra.

19 A xa wuli kasan a belexesole ra sanya solofere serexebade ma, alako a xa seniyeñ Isirayilakae xa seniyeñtareña xa fe ra.»

20 «Haruna na ge xunsare bade yire seniyeñxi, hõromõlingira, nun serexebade be, a xa sikote boore maso naxan mu nu faxa.

21 A xa a belexe firinyie sa na sikote xun tagi, a fa Isirayilakae xa seniyeñtareña, e xa fe kobie, nun e xa yunubi birin masen n tan Ala be. A na ge na kote birin sade sikote xun, a xa na sikote beñin wula i mixi nde saabui ra naxan bara tin na wali ra.

22 Na sikote yunubi birin xaninma a xun ma wula i, a beñin dennaxe.»

23 «Na dangi xanbi, Haruna xa so

hɔrɔmɔlingira kui, a xa a xa dugi gɛsɛ fute daaxie ba, a naxee ragoroxi a ma beenu a xa so yire seniyeŋxi kui. A xa nee lu na.

²⁴ A xa a maxa ye ra yire seniyeŋxi kui, a dugi gbɛtɛɛ ragoro a ma. A na gɛ, a xa mini, a sɛrɛxɛ gan daaxi firin ba, keren a yetɛ bɛ, boore nama bɛ. A xunsare sɔtoma a yetɛ bɛ nun nama bɛ na kui.

²⁵ A man xa yunubi xafari sɛrɛxɛ ture gan sɛrɛxɛbade fari.»

²⁶ «Naxan sikɔtɛ bɛɲin wula i Sentanɛ bɛ, na lan a xa a xa dugie xa, a a fate maxa, a fa gbilen nama yonkinde.

²⁷ Tuura nun sikɔtɛ naxee baxi yunubi xafari sɛrɛxɛ ra, naxee wuli findi xunsare ra yire seniyeŋxi, nee lan e xa xanin nama yonkinde fari ma, e kiri, e sube, nun e ɲaɲɛ birin xa gan tɛ ra.

²⁸ Naxan na wali rabama, a xa a xa dugie xa, a xa a fate maxa ye ra, a fa gbilen nama yonkinde.»

²⁹ «Seriye nan na ki wo bɛ naxan mu kanama abadan. Kike solofere nde, xi fu lɔxɔɛ, wo xa sunyi suxu, wo naxa wali yo raba, wo tan, nun mixi naxee sabatixi naa kɔnɔ e mu findi Isirayilakae ra.

³⁰ Na findima xunsare lɔxɔɛ ra wo bɛ, alako wo xa seniyeŋ, wo xa yunubi birin xa xafari n tan Alatala ya i.

³¹ Na findima malabui nun sali lɔxɔɛ ra wo bɛ. Wo xa sunyi suxu na lɔxɔɛ. Yi seriye mu kanama abadan.»

³² «Ala naxan sugandixi, a naxan tixi sɛrɛxɛdube kuntigi ra, na nan wo xun sarama. A luma a baba xa wali raba ra. A luma sɛrɛxɛdube dugi seniyeŋxie ragoro ra a ma.

³³ A luma yire seniyeñxi, hōrōmōlingira, serexebade, serexedubee nun Isirayila jama birin xun sara ra.

³⁴ Yi seriye mu kanama abadan, alako ñe birin xunsare xa ba Isirayilakae be e xa yunubi birin ma fe ra.»

E Alatala xa yaamari birin suxu alo a masenxi Annabi Munsa be ki naxe.

17

Serexe bama dennaxe

¹ Alatala naxa a masen Annabi Munsa be,

² «A fala Haruna be nun a xa die be, a nun Isirayilaka birin be, Alatala yi nan yamarixi.

³ Isirayilaka naxan ninge, xa na mu a ra yexee, xa na mu a ra si bama serexe ra jama yonkinde kui, xa na mu a ra jama yonkinde fari ma,

⁴ a mu a xaninma hōrōmōlingira sode de xa ra alako a xa a fi n tan Alatala ma hōrōmōlingira yire, na kanyi luma ñe alo faxeti. A bara faxe ti, a lanma na kanyi xa keru jama ya ma.

⁵ Yi yaamari wama a masenfe ñe a Isirayilakae mu lanma e xa serexe ba burunyi. E xa fa xanunteya serexe ra serexedube nan xon n tan Alatala ya i n ma hōrōmōlingira sode de ra.

⁶ Serexedube xa na wuli kasan n tan Alatala xa serexebade seetie ma hōrōmōlingira sode de ra, a man xa na ture gan te i, a xa findi xiri fanyi ra n tan Alatala be.

⁷ Isirayilakae naxa sikote serexe ba kuye be sonon de. Na findima yanfanteya nan na n tan Alatala mabiri. Yi yaamari mu kanama abadan.»

⁸ «A fala e be, Isirayilaka, xa na mu a ra xone naxan sabatixi e tagi, xa a serexe gan daaxi, xa na mu a ra serexe gbete ba,

⁹ a mu a xanin hɔrɔmɔlingira sode de ra, alako a xa fi n tan Alatala ma, na kanyi kerima ne a xa nama tagi.»

Wuli minfe tonyi

¹⁰ «Xa Isirayilaka nde, xa na mu a ra xone nde naxan sabatixi Isirayila boxi ma a naxa wuli min, n gbilenma ne na kanyi foxo ra, n fa a keru a xa nama ya ma,

¹¹ barima sube nii bara lu a wuli ya ma. N bara wuli findi wo xunsare ra, naxan bama serexe ra serexebade fari. Wuli nan na xunsare ra.

¹² Na na a ra, n bara Isirayilakae yamari e naxa wuli min. Wo xa xone naxee sabatixi Isirayila boxi ma, e fan naxa wuli min de.

¹³ Xa Isirayilaka, xa na mu a ra xone nde naxan na wo tagi, sa sube nde, xa na mu a ra xoni nde faha naxan daxa a xa don, a xa na wuli ifili boxi ma, a bende sa a fari,

¹⁴ barima sube nii na a wuli nan ya ma. Na na a ra, n bara Isirayilakae yamari wo naxa sube wuli yo min, barima sube nii na a wuli nan ya ma. Naxan yo na raba, a fama keride Isirayila nama ya ma.»

¹⁵ «Xa Isirayilaka, xa na mu a ra xone nde naxan na wo tagi, na sube don naxan faxaxi a yete ma, xa na mu a ra sube gbete naxan faxaxi ki gbete ra, na kanyi xa a xa dugie xa ye ra, a man xa a yete maxa. A mu seniyenma han nummare ra.

16 Xa a mu a xa dugie xa, xa a mu a yete maxa, na seniyentarepa luma ne a ma.»

18

Kafui seriye

1 Alatala naxa a masen Annabi Munsa be,

2 «A fala Isirayilakae be Alatala nan n na, wo Marigi Ala.

3 Wo naxa Misirakae xa naamunye raba, wo nu na dennaxe. Wo man naxa Kanaankae fan ma naamunye raba, n wo xaninma dennaxe. Wo naxa bira e xa seriye foxo ra.

4 Wo xa n tan nan ma seriye nun n ma yaamarie rabatu, barima Alatala nan n na, wo Marigi Ala.

5 Wo xa bira n ma seriye nun n ma yaamarie nan foxo ra. Mixi naxan nee rabatuma, a simaya sotoma nee nan saabui ra. Alatala nan n na.»

6 «Wo naxa kafu wo nun wo barima. Alatala nan n na.»

7 «Wo naxa kafu wo nun wo nga, naxan findixi wo baba xa gine ra. Wo nga nan wo nga ra, wo naxa kafu a ra.»

8 «Wo naxa kafu wo nun wo nanden, naxan findixi wo baba xa gine ra.»

9 «Wo naxa kafu wo nun wo maagine, naxan findixi wo baba xa na mu a ra wo nga xa di ra, naxan barixi wo xonyi xa na mu a ra yire gbete.»

10 «Wo naxa kafu wo nun wo xa di xeme xa di gine, wo naxa kafu wo nun wo xa di gine xa di gine. E fatanxi wo yete fate nan na.»

11 «Wo naxa kafu wo nun wo baba xa gine gbete xa di gine, wo baba naxan barixi. Wo maagine na a ra.»

12 «Wo naxa kafu wo nun wo baba maagine ra. Wo baba bariboore na a ra.»

13 «Wo naxa kafu wo nun wo nga xunya, xa na mu a ra a taara. Wo nga bariboore na a ra.»

14 «Wo naxa kafu wo nun wo baba xunya xa gine, xa na mu a ra a taara xa gine. Wo baba xunya xa na mu a ra a taara nan gbe findixi na gine ra. Wo nga nun wo mama nan lanxi e ma.»

15 «Wo naxa kafu wo nun wo xa di xa gine, wo xa di nan xa gine a ra.»

16 «Wo naxa kafu wo nun wo xunya, xa na mu a ra wo taara xa gine.»

17 «Xa wo nun gine nde bara kafu, wo nun a xa di gine tan naxa kafu de. Wo nun a xa di xeme xa di gine naxa kafu de, wo nun a xa di gine xa di gine naxa kafu de. Baribooremae na e ra, na fe mooli mu fan.»

18 «Wo nun wo xa gine xunya naxa kafu de, xa na mu a ra a taara, wo xa gine xa simaya kui. Na fe fama ne toone ra.»

19 «Wo nun gine naxa kafu a xa kike wali kui de, barima a mu seniyenxi na temui.»

20 «Sade fe naxa lu wo nun wo malanboore xa gine tagi de, na findima seniyentareja nan na.»

21 «Wo naxa wo xa di yo ba serexe ra Molo ko kuye be. Wo naxa wo Marigi Ala xili bexu. Alatala nan n na.»

22 «Xeme naxa kafu nun xeme ra. Fe jaaxi na a ra. Xeme lanma e nun gine nan xa kafu.»

²³ «Xeme naxa kafu nun sube ra. Gine fan naxa kafu nun sube ra. Na fe mooli mu fan feo.»

²⁴ «Wo naxa wo manoxo yi fe moolie ra, alo na sie a rabaxi ki naxe n naxee keru wo ya ra.

²⁵ E xa fe jaaxie bara boxi yati manoxo. N e ratonxi na nan ma, e mu luma yi boxi ma sonon.

²⁶ Wo tan Isirayilakae nun xone naxee na wo tagi, wo xa n ma seriye nun n ma yaamarie rabatu. Wo naxa yi fe xonxie raba de.

²⁷ Bekae nu bara na mooli raba beenu wo xa fa. Yi boxi findi yire seniyyentare ra na nan ma.

²⁸ Xa wo fan bira na mooli foxo ra, wo fan kerima ne yi boxi ma.

²⁹ Mixi yo naxan na mooli rabama, a kelima ne a xa nama ya ma.

³⁰ Wo xa n ma yaamarie rabatu, wo naxa na fe xonxie raba alo mixi naxee nu na be beenu wo xa fa. Wo naxa findi mixi seniyyentaree ra. Alatala nan n na, wo Marigi Ala.»

19

Tinxinyi naxan nafan Ala ma

¹ Alatala naxa a masen Annabi Munsa be,

² «A fala Isirayilakae be, wo xa seniyyen, barima n tan seniyyen, wo Marigi Alatala.

³ Birin xa e nga nun e baba binya. Birin xa malabui loxoe seriye rabatu. Alatala nan n na, wo Marigi Ala.»

⁴ «Wo naxa kuyee batu, wo naxa wure raxunu kuye yailanfe ra. Alatala nan n na, wo Marigi Ala.»

⁵ «Wo xa xanunteya serexe ba n tan Alatala be a raba ki ma.

⁶ Serexe sube xa don a faxa loxoe, xa na mu a ra na kuye iba. Sube na xi saxan ti, na xa sa te i.

⁷ Naxan luma han xi saxan, a raharamuxi, a mu lan na mooli xa don.

⁸ Naxan na rabama, a na sare sotoma ne, barima a bara n tan Alatala xa se seniyenxi yelevu. Na kanyi raminima ne Isirayila jama ya ma.»

⁹ «Wo na xe xaba wo xonyi, wo naxa a tuxuie xaba. Baloe naxan birama boxi ma, wo xa na lu naa.

¹⁰ Wo na weni bogi ba wo xa sansie kon na, wo naxa gbilen a ma a firin nde. Bogi naxee fan yolonma e yete ma, wo xa nee fan lu na setaree be, a nun mixie be naxee kelixi jamanε gbeteε ma. Alatala nan n na, wo Marigi Ala.»

¹¹ «Wo naxa muje ti. Wo naxa wule fala. Wo naxa wo boore yanfa.

¹² Wo naxa wo kali n xili ra wule fari, barima na kui wo wo Marigi Ala xili nan kanama. Alatala nan n na.»

¹³ «Wo naxa wo ngaxakerenyi tooro, wo naxa a muja. Wo naxa wo xa walike xa wali sare lu han tina.»

¹⁴ «Wo naxa tulixori konbi, wo naxa donxui rabira. Wo xa gaaxu n tan Ala ya ra. Alatala nan n na.»

¹⁵ «Wo naxa kiiti sa tinxintareya ra. Wo naxa setare rafisa a boore be, wo naxa banna rafisa a boore be. Wo xa kiiti birin sa tinxinyi ra.

¹⁶ Wo naxa wo boore mafala. Wo naxa wo boore toonege alako a xa faxa. Alatala nan n na.

¹⁷ Wo naxa wo ngaxakerenyi xon. Wo xa wo boore rasi, alako wo naxa yunubi soto a xa fe ra.

18 Wo naxa wo gberoxo. Wo naxa gbesenxonneya ragata wo sondonyi kui wo ngaxakerenyi be. Wo xa wo boore xanu alo wo wo yete xanuma ki naxe. Alatala nan n na.»

19 «Wo xa n ma yaamarie rabatu. Wo naxa xuruse mooli firin rate e boore ma. Wo naxa sansi mooli firin si xe keren ma. Wo naxa dugi ragoro wo ma naxan degexi gese mooli firin na.»

20 «Xa xeme nde nun konyi gine nde kafu xeme gbete naxan xa kote doxoxi, naxan xun mu saraxi sinden, naxan mu xoreyaxi, e xa naxankata. Konwo wo naxa e faxa, barima konyi gine nan a ra.

21 Na xeme xa yexee kontonyi ba yete ragbilen serexe ra n tan Alatala be horemolingira sode de ra.

22 Serexedube xa na yexee kontonyi findi xun-sare ra a be n tan Alatala ya i, a xa findi yete ragbilen serexe ra alako a xa yunubi xa xafari.»

23 «Wo na so boxi kui n naxan fima wo ma, wo naxa wo xa sansi sixie bogie don sinden han je saxan. E mu seniye, e luxi alo sunnetare. Wo naxa e don.

24 Naxee fan bogima je naani nde ma, na birin fima n tan Alatala nan ma, a xa findi n ma matoxoe ra.

25 Naxee bogima je suuli nde ma, na tan birin findima wo baloe nan na. Alatala nan n na, wo Marigi Ala.»

26 «Wo naxa sube yo don wo mu naxan kon naxabaxi, a wuli xa mini. Wo naxa sematoe wali raba, wo naxa duureya raba.

27 Wo naxa wo xunsexe maxaba wo xunyi seetie ma a radigilixi ra, wo naxa wo de xabe seetie maxaba,

28 wo naxa wo fate maxaba jonyi to soxi wo ma. Wo naxa pirinti ti wo fate ma. Alatala nan n na.»

29 «Wo naxa wo xa di gine mati langoe ra, alako wo xa boxi naxa bira langoeɾa foxo ra, a xa rafe fe naaxie ra.

30 Wo xa n ma malabui loxoee binya, a nun n ma yire seniyeɾxi. Alatala nan n na.»

31 «Wo naxa mixi fen naxan mixi faxaxie rawoyenma. Wo naxa bira sematoee foxo ra, xa na mu a ra wo findima seniyeɾtaree nan na. Alatala nan n na, wo Marigi Ala.»

32 «Wo xa mixi moxie binya, naxee xunsexe bara fixe. Wo xa gaaxu wo Marigi Ala ya ra. Alatala nan n na.»

33 «Wo naxa mixi rawali a naaxi ra, naxee kelixi jamanε gbete e xa sabati wo xa boxi kui.

34 Wo xa na xoɾe mooli rasene alo wo ngaxak-erenyi. Wo xa a xanu alo wo wo yete xanuma ki naxe. Wo fan nu na xoɾeya nan kui Misira boxi ma. Alatala nan n na, wo Marigi Ala.»

35 «Wo naxa tinxintareya yo raba, kiiti sade, se kuyeya maniyade, se binye maniyade, se rafe daaxi maniyade.

36 Wo xa sikeeli xa kamali. Wo se maniyase kamalixie rawali. Alatala nan n na, wo Marigi Ala, naxan wo ramixi Misira boxi ma.

37 Wo xa n ma seriye nun n ma yaamari birin nabatu. Alatala nan n na.»

20

Fe xonxie Ala mabiri

¹ Alatala naxa a masen Annabi Munsa be,

² «A fala Isirayilakae be, xa Isirayilaka nde, xa na mu a ra xone nde naxan sabatixi Isirayila boxi ma, a xa di nde ba serexe ra Moloکو kuye be, jama xa na kanyi magono gemee ra han a xa faxa.

³ N tan fan gbilenma ne na mixi foxo ra, n a ramini jama ya ma, barima a bara n ma yire seniyenxi yelevu, a bara n xili seniyenxi kana na serexe mooli ra Moloکو kuye be.

⁴ Xa jama a ya raxi na fe ma, e tondi mixi faxade, naxan a xa di baxi serexe ra Moloکو be,

⁵ n tan gbilenma ne na mixi nun a xabile foxo ra, n nee keru e xa jama ya ma, a nun mixi birin naxee n yanfama Moloکو kuye xa fe ra.»

⁶ «Xa mixi nde n yanfa, a bira sematoo foxo ra, a nun mixi naxan mixi faxaxie rawoyenma, n gbilenma na kanyi foxo ra, n a keru a xa jama ya ma.

⁷ Wo xa wo jere seniyenyi kui, alako wo xa seniyen, barima Alatala nan n na, wo Marigi Ala.

⁸ Wo xa n ma yaamarie rabatu, wo xa e ratinme. Alatala nan n na, naxan wo raseniyenma.»

⁹ «Naxan yo a baba danka, xa na mu a ra a nga, wo xa na kanyi faxa. A tan nan a faxa fe ragirixi, barima a bara a baba danka, xa na mu a ra a nga.»

¹⁰ «Xa xeme nde yene raba a malan boore xa gine ra, na xeme nun na gine xa faxa e xa langoeja xa fe ra.»

11 «Xa xeme nde kafu nun a baba xa gine ra, a bara fe jaaxi raba a baba ra. Wo xa na xeme nun na gine faxa e xa yunubi xa fe ra.»

12 «Xa xeme nde kafu nun a xa di xa gine ra, wo xa e firinyi birin faxa na yunubi xa fe ra, barima na fe mooli mu fan feo.»

13 «Xa xeme nde kafu nun xeme gbete ra alo xeme darixi a raba ra gine ra ki naxe, wo xa e firinyi birin faxa na fe xonxi xa fe ra.»

14 «Xa xeme nde kafu nun gine ra nun na xa di gine ra, e bara fe jaaxi raba. Wo xa e gan te ra, xeme nun gine, alako na fe xonxi mooli naxa lu wo tagi.»

15 «Xa xeme nde kafu nun sube ra, wo xa na xeme nun na sube birin faxa.»

16 «Xa gine nde a maso sube ra kafu booreja ra, wo xa na gine nun na sube faxa na fe jaaxi xa fe ra.»

17 «Xa xeme nde kafu nun a maagine ra, a baba xa di gine, xa na mu a ra a nga xa di gine, fe mayaagixi nan a ra. Wo xa e keru e xa jama ya ma, barima xeme bara kafu nun a maagine ra. Na kote xa lu a xun ma.»

18 «Xa xeme nde kafu nun gine ra naxan na a xa kike wali kui, a wuli naxa mini kene ma. E firinyi birin xa keru jama ya ma na fe ma.»

19 «Wo naxa kafu nun wo nga xunya, xa na mu a ra wo nga taara ra, xa na mu a ra wo baba maagine ra, barima wo bariboore nan e ra. Naxan na mooli rabama na kote xa lu a xun ma.»

20 «Xa xeme nde kafu nun a baba xunya xa gine ra, xa na mu a ra a baba taara xa gine ra, e na kote xaninma ne. E birin fama faxade dibaritareja nan kui.»

²¹ «Xa xεμε nde kafu nun a xunya xa gine ra, xa na mu a ra a kafu nun a taara xa gine ra, a bara fe seniyentare raba. E birin fama faxade dibaritarena nan kui.»

²² «Wo xa n ma seriye nun n ma yaamari birin nabatu, wo xa na birin naba, alako wo mu fama keride ki naxe boxi ma n wo rasabatima dennaxe.

²³ Wo naxa bira na boxi sie xa seriye foxo ra, n fama naxee keride wo ya ra. E naxan nabama na mu rafanxi n ma feo.

²⁴ N bara a fala wo be na boxi findima wo gbe ra. N bara na boxi fi wo ma, xije nun kumi gbegbe na dennaxe. Alatala nan n na, wo Marigi Ala, naxan wo sugandixi sie tagi.

²⁵ Wo xa sube raharamuxie nun sube radaxaxie tagi rasa, e nun xoni raharamuxie nun xoni radaxaxie, alako wo naxa findi seniyentaree ra e saabui ra. N bara tonyi doxo na subee, na xonie, nun na boximasee ra. E mu seniyen.

²⁶ Wo xa findi n ma jama seniyenxi ra, barima n tan Alatala nan seniyen. N bara wo sugandi sie tagi, alako wo xa findi n gbe ra.»

²⁷ «Mixi yo naxan mixi faxaxie rawoyenma, xa na mu a ra a findi sematoe ra, wo xa a magono gemee ra han a xa faxa. A tan nan a faxa fe ragirixi.»

21

Serexedube xa seniyenyi

¹ Alatala naxa a masen Annabi Munsa be, «A fala Haruna xa di serexedubee be, serexedube

naxa a yete findi seniyentare ra a xa mixi nde fure saabui ra,

² fo a xa mixi kende nde alo a nga, a baba, a xa di xeme, a xa di gine, a xunya xemema, a taara xemema,

³ nun a maagine, ginedimedi na naxan na, a mu dɔxɔxi xeme taa sinden, a na a xɔnyi. Serexedube na din e fure ra, a findima ne mixi seniyentare ra.

⁴ A mu lanma serexedube xa findi seniyentare ra a xa gine fure xa fe ra, xa na mu a ra a xa gine xa mixie fure xa fe ra.»

⁵ «Xa ɲonfe bara a li, a mu lanma serexedube xa a xunyi bi, xa na mu a ra a de xabee seeti maxaba, xa na mu a ra a fate maxaba.

⁶ E xa seniyeɛ e Marigi Ala be. E naxa e Marigi Ala xili kana, barima e tan nan serexe gan daaxie bama n tan Alatala be, naxee luxi alo n ma donse. E lan e xa seniyeɛ na nan ma.

⁷ A mu lanma serexedube xa langoe gine dɔxɔ, xa na mu a ra gine futi kanɛ, xa na mu a ra gine xeme mɛɛxi naxan na. Serexedube tan seniyeɛ a Marigi Ala be.

⁸ Wo xa a kolon mixi seniyeɛxi ra, barima a tan nan serexe fima Ala ma naxee luxi alo donse. Wo xa a kolon a seniyeɛ, barima n tan Alatala seniyeɛ, n tan naxan wo raseniyeɛma.

⁹ Xa serexedube xa di gine nde a yete rayaagi findife ra langoe ra, a bara a baba rayaagi. A lanma na gine xa gan te ra.»

¹⁰ «Serexedube kuntigi naxan sugandixi a ngaxakerenyie tagi, e ture seniyeɛxi sa a ma, e

dugi seniyeñxi ragoro a ma, na naxa a xunsexe kana, a naxa a xa dugi iboo.

¹¹ A naxa so fure xun ma, a naxa findi seniyeñtare ra fure xa fe ra, hali a baba xa na mu a ra a nga.

¹² A naxa mini yire seniyeñxi kui, a naxa a Marigi Ala xa horomolingira manoo, barima n tan Ala nan a sugandixi, ture seniyeñxi saxi a xunyi ma. Alatala nan n na.

¹³ A xa ginemedi doxo gine ra.

¹⁴ A naxa kaape gine doxo, a naxa gine rabeñxi doxo, a naxa langoe doxo, a naxa gine doxo ginemedi mu naxan na. A xa ginemedi tongo gine ra a xa mixie ya ma,

¹⁵ alako a naxa a bonsoe rayaagi. Alatala nan n na naxan a raseniyeñma.»

¹⁶ Alatala naxa a masen Annabi Munsa be,

¹⁷ «A fala Haruna be, mixi mabenxi yo naxa serexedube wali raba, a serexe sa serexebade ma n tan Ala be. Na mu lanma abadan.

¹⁸ Mabenyie nan ya naxee mu daxa e xa e maso serexebade ra: naxan ya mu fan, naxan mu noma jerede a fanyi ra, naxan salonse nde kanaxi,

¹⁹ naxan belexe, xa na mu a ra sanyi giraxi,

²⁰ naxan kuntinxi, naxan xa kuye mu kamalixi, naxan ya mu fanxi, fate kiri fure na naxan ma, nun xeme banaxi.

²¹ Mabenyi yo fatan serexedube Haruna xabile ra, a naxa a maso n tan Alatala xa serexebade ra serexe gan daaxi bafe ra a Marigi Ala be.

²² A noma n tan Ala xa donse seniyeñxi mooli birin donde,

²³ kɔnɔ a mu lan a xa a maso yire seniyeŋxi fisamante xa dugi ra, xa na mu a ra serexɛbade ra. A naxa n ma yire seniyeŋxi xili kana, barima Alatala nan n na, naxan a raseniyeŋma.»

²⁴ Annabi Munsa naxa na masenyi ti Haruna, a xa die, nun Isirayilaka birin bɛ.

22

Serexɛe nun maraseniyeŋyi

¹ Alatala naxa a masen Annabi Munsa bɛ,

² «A fala Haruna nun a xa die bɛ, e xa Isirayilakae xa serexɛ seniyeŋxie ba a ba ki ma, barima e nee fima n tan nan ma. Serexɛdubɛe naxa n xili seniyeŋxi kana. Alatala nan n na.»

³ «A fala e bɛ, xa e bɔnsɔɛ mixi nde sa findi seniyeŋtare ra, a naxa a maso Isirayilakae xa serexɛ ra e naxee fima n tan Alatala ma, na kanyi kerima nɛ n ya i. Alatala nan n na.»

⁴ «Kunɛ fure na mixi yo ma Haruna bɔnsɔɛ ya ma, xa na mu a ra kɔrɔsila fure, na mu lan a xa serexɛ seniyeŋxi don fo a xa gɛ seniyeŋde. A man mu lan mixi xa na raba xa a bara din mixi nde ra naxan bara din mixi fure ra. Xa ye seniyeŋtare na minife mixi xemɛya kui, a mu lan a xa serexɛ seniyeŋxi don.

⁵ Xa mixi nde bara din bubuse ra, xa na mu a ra mixi seniyeŋtare ra, na mu lan a xa serexɛ seniyeŋxi don.

⁶ Naxan na rabama, na kanyi findima seniyeŋtare nan na han nunmare. Beenu a xa na serexɛ seniyeŋxi don, a xa a fate maxa.

⁷ Soge na goro, a bara seniyeŋ, a nɔma serexɛ seniyeŋxi donde sɔnɔn, barima a baloe na a ra.»

8 «Serexedube naxa sube don naxan faxaxi a yete ma. A man naxa sube don sube gbete naxan faxaxi, alako a naxa findi seniyyentare ra. Alatala nan n na.»

9 «Serexedubee xa n ma yaamarie rabatu e baloe xa fe ra, alako e naxa yunubi soto, e fa faxa. Alatala nan n na, naxan e raseniyyenma.

10 Mixi yo naxa serexe seniyyenxi don xa serexedube mu a ra. Hali serexedube xa xone, xa na mu a ra a xa walike mu lanma a xa a don.

11 Kono serexedube xa konyi, a naxan sara kobiri ra, a nun na konyi xa denbaya tan noma serexedube baloe donde.

12 Serexedube xa di gine naxan dɔxɔxi xeme Ala kolontare xon ma, naxa serexe seniyyenxi don.

13 Serexedube xa di gine naxan findixi kaape gine ra, xa na mu a ra xeme meexi naxan na e mu di bari, a gbilen a baba xonyi alo a nu na naa ki naxe a dimedi ra, na gine noma a baba baloe donde. Mixi yo naxan mu findi Isirayilaka ra, na mu lanma a xa na mooli don.

14 Xa mixi nde sa serexe seniyyenxi don kolontareya ma, a lan a xa a joxoe fi kobiri ra, a man xa nde sa na fari. Na findima kobiri naxan na, a na donse sare nan itaxunma dɔxɔ suuli ra, a fa dɔxɔ keren ba a ra, a na so serexedube yi ra.

15 Serexedubee naxa fe raba n tan Alatala xa serexe seniyyenxie ra, a mu lan naxan xa raba

16 alako e naxa yunubi soto na serexee xa fe ra e naxee donxi. Alatala nan n na, naxan e raseniyyenma.»

17 Alatala naxa a masen Annabi Munsa be,

18 «A fala Haruna, a xa die, nun Isirayilakae birin be, Isirayilakae birin, a nun xone naxee sabatixi Isirayila boxi ma, mixi naxan serexe gan daaxi bama n tan Alatala be laayidi nde rakamalife ra, xa na mu a ra a yete janige rabafe ra,

19 a lan a xa tuura nan ba, xa na mu a ra yexee kontonyi, xa na mu a ra sikote, lanyuru mu na naxan ma.

20 Wo naxa xuruse yo ba lanyuru na naxan ma, barima n tan Ala mu na mooli rasuxuma.

21 Xa mixi nde wama xuruse xungbe, xa na mu a ra xuruse lanma bafe xanunteya serexe ra n tan Alatala be, laayidi nde rakamalife ra, xa na mu a ra janige rabafe ra, na xuruse fate xa fan, lanyuru yo naxa lu a ma, xa na mu a ra n tan Ala mu a rasuxuma.

22 Wo naxa xuruse yo ba naxan ya mu fan, naxan maxonoxi, naxan mabenxi, fure na naxan kiri ma. Wo naxa na mooli sa n tan Alatala xa serexebade fari, a xa findi serexe gan daaxi ra.

23 I noma ninge, xa na mu a ra yexee kepa jaaxi bade janige serexe ra, konon i mu noma na bade laayidi rakamali serexe ra de.

24 Wo naxa xuruse banaxi, xemeya kanaxi, xa na mu a ra xemeya mu naxan be, ba serexe ra n tan Alatala be. Wo naxa na mooli ba serexe ra wo xa boxi ma.

25 Wo naxa na xuruse mooli rasuxu xone yi ra, wo xa e ba serexe ra wo Marigi Ala be, barima e fate mu fanxi, e mu kamalixi. N tan Ala mu nee rasuxuma.»

26 Alatala naxa a masen Annabi Munsa be,

27 «Ninge yore, yexee yore, nun si yore na bari, e xa lu e nga bun ma xi solofere, beenu e xa findi

serexe gan daaxi ra n tan Alatala be.

²⁸ Wo naxa ninge, xa na mu a ra yexee, nun a xa di kon naxaba loxoere keren kui.»

²⁹ «Wo xa tantui serexe ba n tan Alatala be a ba ki ma alako n xa a suxu.

³⁰ Wo xa na serexe don na loxoere yati, a naxa lu han geesege. Alatala nan n na.»

³¹ «Wo xa n ma yaamarie rabatu, wo xa e suxu. Alatala nan n na.

³² Wo naxa n xili seniyeenxi kana. Isirayilakae birin xa a kolon n seniyeen. Alatala nan n na, naxan wo raseniyeenma.

³³ N tan nan wo ramini Misira boxi ra, n xa findi wo Marigi Ala ra. Alatala nan n na.»

23

Isirayila sali loxoere

¹ Alatala naxa a masen Annabi Munsa be,

² «A fala Isirayilakae be, n tan Alatala xa sali loxoere nan ya, naxee seniyeenxi wo be.

³ Wo xa wali xi senni, konɔ xi solofere nde findixi malabui loxoere nan na, malanyi seniyeenxi rabama loxoere naxe. Wo naxa wali yo raba na loxoere. Na findixi n tan Alatala nan gbe ra. Wo xa na seriyee suxu wo sabbatide birin.»

⁴ «N tan Alatala xa sali loxoere gbeteen nan ya, wo nama maxilima loxoere naxee ma:

⁵ Kike singe, xi fu nun naani nde, soge dula temui, Sayamaleke Dangi Sali serexe xa ba n tan Alatala be.

⁶ N tan Alatala xa Taami Lebinitare Sali foloma na kike xi fu nun suuli nde loxoere ne. Wo xa taami lebinitaree don na xi solofere bun ma.

⁷ Na sali xi singe kui, wo xa malanyi seniyenxi raba. Wo naxa wali yo raba na loxoε.

⁸ Wo xa serexεε gan daaxie ba n tan Alatala be na xi solofere bun ma. Xi solofere nde loxoε, wo man xa malanyi seniyenxi raba. Wo naxa wali yo raba na loxoε.»

⁹ Alatala naxa a masen Annabi Munsa be,

¹⁰ «A fala Isirayilakae be, wo na so boxi ma n naxan fima wo ma, wo na xe xaba, wo xa a xiri singe xanin serexedube xon.

¹¹ Serexedube xa na masen n tan Alatala be malabui loxoε dangi xanbi, alako n xa a suxu wo be.

¹² Wo na xiri singe masenma n tan Alatala be loxoε naxe, wo man xa yexεε fanyi je keren daaxi ba serexε gan daaxi ra n be,

¹³ a nun sansi xori dinxi konbo ya keren naxan masunbuxi ture ra. Na findima serexε gan daaxi ra n tan Alatala be naxan xiri rafan n ma. Wo man xa weni litiri keren ba weni serexε ra.

¹⁴ Wo naxan soto xe xaba temui, wo naxa sese don, taami, tonsεε ganxi, nun sansi xori ra, beenu wo xa na serexε ba wo Marigi Ala be. Serye nan na ki wo bonsεε be wo sabatide birin. Na mu kanama abadan.»

¹⁵ «Folo malabui loxoε kuye iba ma, wo na xiri singe lintanma Alatala ya i serexε ra loxoε naxe, loxun solofere xa dangi.

¹⁶ A xi tongo suuli nde, malabui loxoε xi solofere nde kuye iba, wo man xa serexε ba n tan Alatala be daxamui neene ra.

¹⁷ Wo xa fa taami firin na wo naxan lintanma n tan Alatala ya i serexε ra, kelife ra wo xonyie. Wo xa e yailan sansi xori luxutaxi konbo ya keren na,

wo lebini sunbu a ra. Bogise singe serexe nan na ki n tan Alatala be.

¹⁸ Wo man xa yexee fanyi je keren daaxi solofere sa na taami fari, tuura lanma keren, nun yexee kontonyi firin naxee bama serexe gan daaxie ra. Wo man xa sansi xori luxutaxi nun weni serexe sa nee fari. Nee gan xiri nafan n tan Alatala ma.

¹⁹ Wo man xa sikote keren ba yunubi xafari serexe ra, a nun yexee firin je keren daaxi, naxee findima xanunteya serexe ra.

²⁰ Serexedube na birin lintanma n tan Alatala ya i serexe ra, na taami singee, nun na yexee firinyie. E birin fima n tan Alatala nan ma, e fa lu serexedube be.

²¹ Na loxe wo xa malanyi seniye nxi raba. Wo naxa wali yo raba na loxe. Seriyee na a ra wo bonsoe be yire birin abadan.

²² Wo na xe xaba wo xonyi, wo naxa a tuxuie xaba. Baloe naxan birama boxi ma, wo xa na lu naa setaree be, a nun mixie be naxee kelixi jamanee gbete ma. Alatala nan n na, wo Marigi Ala.»

²³ Alatala naxa a masen Annabi Munsa be,

²⁴ «A fala Isirayilakae be, kike solofere nde, xi singe, wo xa wo malabu na loxe, wo xa jama maxili sara xui ra, wo malanyi seniye nxi raba.

²⁵ Wo naxa wali yo raba na loxe, wo xa serexe gan daaxie ba n tan Alatala be.»

²⁶ Alatala naxa a masen Annabi Munsa be,

²⁷ «Kike solofere nde, xi fu nde xa findi Xunsare loxe ra. Wo xa malanyi seniye nxi raba, wo xa sunyi suxu, wo xa serexe gan daaxie ba n tan Alatala be.

28 Wo naxa wali yo raba na loxoε, barima Xunsare loxoε na a ra, wo xun sarama wo Marigi Alatala ya i loxoε naxe.

29 Mixi naxan tondima sunyi suxude na loxoε, na kanyi raminima ne a xa jama ya ma.

30 Mixi naxan wali yo rabama na loxoε, n a sontoma ne a xa jama tagi.

31 Wo naxa wali yo raba. Seriyε na a ra wo bonsoε birin be yire birin, naxan mu kanama abadan.

32 Na findima malabui loxoε nan na wo be. Wo xa sunyi suxu folofe na kike xi solomanaani loxoε nunmare ra, han a xi fu loxoε nunmare ra.»

33 Alatala naxa a masen Annabi Munsa be,

34 «A fala Isirayilakae be, kike solofere nde xi fu nun suuli nde, Bage Ti Sali foloma, a bu xi solofere n tan Alatala xa binyε bun ma.

35 Sali xi singe malanyi seniyenxi rabama ne. Wo naxa wali yo raba na loxoε.

36 Wo xa serexe gan daaxie ba n tan Alatala be xi solofere bun ma. Xi solomasaxan nde wo xa malanyi seniyenxi raba. Wo xa serexe gan daaxie ba n tan Alatala be. Sali xungbe na a ra, wo naxa wali yo raba.»

37 «N tan Alatala xa sali loxoε xungbee nan na ki wo be. Wo xa serexe gan daaxie, sansi xori serexεe, nun weni serexεe ba a ba temui.

38 Wo xa n tan Alatala xa malabui loxoεe rabatu, wo xa xanunteya serexεe, wo xa laayidi serexεe, a nun wo xa janige serexεe wo naxee fima n ma, wo xa e rakamali.»

39 «Kike solofere nde xi fu nun suuli nde, wo ge xanbi wo xa xεe bogisee malande, wo xa sali

raba n tan Alatala be xi solofere bun ma. Sali xi singe nun a xi solomasaxan nde findixi malabui loxoee nan na.

⁴⁰ Sali xi singe, wo xa bogise fanyie ba sansi bilie kon na, tugi fensee, nun wuri tofanyi jingie. Wo xa seewa wo Marigi Alatala ya i xi solofere bun ma.

⁴¹ Wo xa yi sali raba Alatala be ne yo ne xi solofere bun ma. Seriyee na a ra wo bonsoe birin be naxan mu kanama abadan. Wo xa na sali raba kike solofere nde kui.

⁴² Wo xa xi bagee kui na xi solofere bun ma. Isirayilakae birin xa xi bagee kui,

⁴³ alako wo bonsoe xa a kolon a n a niyaxi ne wo benbae xa xi bagee kui n e ramini Misira boxi ra temui naxee. Alatala nan n na, wo Marigi Ala.»

⁴⁴ Annabi Munsa xa masenyi nan na ki, a naxan masen Isirayilakae be Alatala xa salie xa fe ra.

24

Yire seniyenxi lanpui

¹ Alatala naxa a masen Annabi Munsa be,

² «Isirayilakae yamari, e xa fa oliwi ture fanyi ra i xon, alako lanpuie xa dexe temui birin.

³ Haruna xa a jengi sa lanpuie xon, naxee na hoxomolingira kui, yire seniyenxi seeti ma. Saate kankira na na yire seniyenxi fisamante nan kui, dugi gbakuxi a sode de ra. A xa a niya lanpuie xa nu dexe n tan Alatala ya i temui birin, kelife nunmare ra han geesege. Seriyee na a ra wo bonsoe be abadan.

4 Haruna xa a ɲengi sa lanpuie xɔn naxee dɔxɔxi lanpui dɔxɔ se xɛɛma daaxie fari n tan Alatala ya i.»

5 «Wo xa taami fu nun firin yailan sansi xɔri luxutaxi fanyi ra, taami keren, sansi xɔri dinxi konbo ya keren.

6 Wo xa e sa safe firin, senni na sɛɛti keren, senni na sɛɛti boore, teebili fari n tan Alatala ya i.

7 Wo xa surayi fanyi sa taami safɛe sɛɛti ma, naxan fama gande taami ɲɔxɔɛ ra n tan Alatala bɛ.

8 Taami xa sa teebili fari malabui lɔxɔɛ birin. Seriyɛ na a ra Isirayilakae bɛ abadan.

9 Haruna nun a xa die xa na taamie don yire seniyeɲxi, barima serɛxɛ seniyeɲxi na a ra, naxee fixi Alatala ma a gan daaxi ra. Seriyɛ na a ra naxan mu kanama abadan.»

Ala xa seriyɛ matandie

10 Lɔxɔɛ nde mixi nde naxa so Isirayilakae ya ma. A nga findi Isirayilaka nan na, kɔnɔ a baba naxa findi Misiraka ra. Gere naxa bira a i na mixi nun Isirayilaka nde tagi.

11 Na kui, na Isirayila gine xa di naxa Alatala xili bɛxu, a a konbi. E naxa a xanin Annabi Munsa xɔn na fe ma. Na mixi nga xili nɛ Selomiti, Dibiri xa di gine, Dana bɔnsɔɛ.

12 E naxa a suxu a fanyi ra han Alatala yati naxa a xa fe ya iba e bɛ.

13 Alatala naxa a masen Annabi Munsa bɛ,

14 «ɲNama xa yi konbiti xanin ɲama yonkinde fari ma. Naxee na konbi mɛxi, nee xa e bɛlɛxɛɛ

sa a xunyi, pama birin fa a magɔnɔ gɛmɛ ra han a faxa.

¹⁵ I xa a fala Isirayilakae bɛ, mixi yo naxan n tan Ala konbima, na yunubi kote luma a xun ma.

¹⁶ Naxan na n tan Alatala xili bɛxu, pama birin xa a magɔnɔ gɛmɛ ra han a xa faxa. Xa a findi xɔpɛ ra, xa a findi beka ra, a xa faxa barima a bara n tan Alatala bɛxu.»

¹⁷ «Mixi naxan na adamadi faxa, a fan xa faxa.

¹⁸ Mixi naxan na mixi nde xa xuruse faxa, a xa a pɔxɔɛ so a yi. Nii pɔxɔɛ xa fi nii ra.

¹⁹ Mixi naxan na a boore maxɔnɔ, a fan xa maxɔnɔ na ki.

²⁰ Maxɔnɛ pɔxɔɛ maxɔnɛ nan na. Ya pɔxɔɛ ya nan na, pinyi pɔxɔɛ na pinyi nan na. A xa maxɔnɔ alɔ a a rabaxi a boore ra ki naxɛ.

²¹ Mixi naxan na mixi xa xuruse faxa, a xa a pɔxɔɛ fi, kɔnɔ mixi naxan na adamadi faxa, na kanyi fan xa faxa.

²² Seriyɛ keren na a ra wo birin bɛ, xɔpɛɛ nun Isirayilakae. Alatala nan n na, wo Marigi Ala.»

²³ Annabi Munsa to gɛ na masenyi tide Isirayilakae bɛ, pama naxa na konbiti xanin pama yonkinde fari ma, e a magɔnɔ gɛmɛ ra han a faxa. Na kui e naxa Alatala xa yaamari suxu alɔ Annabi Munsa a masenxi e bɛ ki naxɛ.

25

Malabui pɛ

¹ Alatala naxa a masen Annabi Munsa bɛ Turusinina geya fari,

² «A fala Isirayilakae bɛ, wo na so bɔxi kui n naxan fima wo ma, wo xa a lu bɔxi xa malabu n tan Alatala xa binyɛ bun ma.

³ Wo xa xe wali suxu, wo xa meeni weni bilie ma, wo xa e bogie ba. Wo xa na birin naba je senni bun ma,

⁴ kono je solofere nde wo xa a lu boxi xa a malabu n tan Alatala xa binye bun ma. Wo naxa xe wali raba, wo naxa fefe raba weni bilie ra na je kui.

⁵ Sansi bogi naxee bulama e yete ma, wo naxa e xaba. Weni bogie naxee bogima e yete ma, wo xa e lu naa barima malabui je na a ra boxi be.

⁶ Boxi naxan naminima na malabui je kui, wo birin noma na donde, wo tan, wo xa konyie, wo xa walikae, wo xa xone,

⁷ wo xa xurusee, a nun burunyi sube naxee na boxi kui. Boxi naxan namini a yete ra na je ra, na nan findima wo baloe ra.»

Xoreya Ne

⁸ «Wo xa malabui je solofere konti, je tongo naani nun solomanaani, je solofere doko solofere.

⁹ A kike solofere xi fu nde, wo xa sarae fe pama be boxi birin kui, a findima Xunsare Loxoe nan na.

¹⁰ Na je tongo suuli nde xa findi xoreya je ra boxi mixi birin be. Konyi birin xa xoreya soto, kankan xa gbilen a xonyi a xabile ya ma.

¹¹ Na je tongo suuli nde findima Xoreya Ne nan na wo be. Wo naxa sansi xorie si, wo naxa sansi bogie nun weni bogie ba naxee bulama e yete ma,

¹² Xoreya Ne nan na ra, waxati seniyenxi na a ra wo be. Boxi daxamui xa findi wo xa baloe ra.»

¹³ «Na Xoreya Ne kui, birin xa gbilen e xa boxi ma.

14 Xa wo bɔxi matima wo ngaxakerenyi ma, xa na mu a ra wo bara nde sara wo ngaxakerenyi ma, wo naxa wo boore tɔɔrɔ na kui.

15 Wo xa na sara sare tinxinxi ra, naxan jɛe kɔntima kelife Xɔreyɔ Jɛ waxati. Wo ngaxakerenyi xa na mati wo ma seriye ki ma. A xa xɛ xaba jɛ kɔnti naxee luxi beenu Xɔreyɔ Jɛ xa a li.

16 Xa jɛ wuyaxi luxi, a sare xa mate na ki. Xa jɛ wuyaxi mu luxi, a sare xa magoro. Wo xa a mato xɛ xabama sanmaya yeri beenu Xɔreyɔ Jɛ xa a li.

17 Wo naxa wo boore tɔɔrɔ na kui. Wo xa gaaxu wo Marigi Ala ya ra. Alatala nan n na, wo Marigi Ala.»

18 «Wo xa n ma seriye suxu, wo xa n ma yaamarie rabatu, alako wo xa lu yi bɔxi ma bɔjesa kui.

19 Bɔxi daxamui fama wo wasade, wo man sabatima bɔjesa kui.

20 Xa wo sa maxɔrinyi ti yi ki, <Xa won mu sese sima jɛ solofere nde kui, xa won mu sansi xabama na temui, won baloma munse ra fa?>

21 N tan nan baraka ragoroma wo ma jɛ senni nde kui, naxan findima baloe ra wo bɛ jɛ saxan bun ma.

22 Wo xa sansi xɔri si jɛ solomasaxan nde kui, kɔnɔ wo donse ragataxi nan donma han jɛ solomanaani nde. Donse naxan nagataxi, na wo ralima nɛ han baloe nɛnɛ sa minima temui naxɛ.»

23 «Wo naxa bɔxi mati a xa lu wo boore yi ra abadan, barima n tan nan gbe bɔxi ra. Wo luxi nɛ alɔ xɔjɛ naxee yigiyaxi n xɔnyi.

24 Seriyε ki ma, wo xa tin yi bɔxi birin xun xa sara.

25 Xa wo ngaxakerenyi nde a xa bɔxi mati a xa setarepa ma, a bariboore nde xa na bɔxi matixi xun sara.

26 Xa a bariboore mu na naxan nɔma na bɔxi xun sarade, kɔnɔ a tan naxa sa na xunsare fεere soto a yetε ra,

27 a xa bɔxi sare kɔnti seriyε ki ma, kelife a sara temui, a fa na jɔxɔε ragbilen a sara mixi ma, alako a xa gbilen a xa bɔxi masoto ra.

28 Kɔnɔ xa a mu na xunsare fεere soto, na bɔxi xa lu a sara mixi yi ra han Xɔreyɔ Ne ra. Na temui bɔxi kanyi man xa gbilen a xa bɔxi masoto ra.»

29 «Xa mixi nde sa a xa banxi mati naxan na taa kui tete rabilinxi naxan na, a nɔma na banxi xun sarade jε keren bun ma.

30 Xa na banxi xun mu sara na jε kui, a luma ne a sara mixi nun a bɔnsɔε yi ra abadan. Hali Xɔreyɔ Ne kui a sara mixi mu kelima naa.

31 Kɔnɔ banxi naxee tixi taa xunxurie kui, naxee mu rabilinxi tete ra, nee luma alo bɔxi. E nɔma xun sarade. Naxan na mɔoli sarama, a lanma a xa mini na banxi Xɔreyɔ Ne ra.»

32 «Lewikae tan nɔma e xa banxie xun sarade e xa taaε kui temui birin.

33 Naxan bara Lewika nde xa banxi sara, a minima ne na kui Xɔreyɔ Ne temui, barima banxi naxee na Lewikae xa taaε kui, nee findixi Lewikae nan gbe ra Isirayila jama tagi.

34 Xe naxee na Lewikae xa taaε rabilinyi, nee mu nɔma matide, barima Lewikae nan gbe e ra abadan.»

Doni seriyε

³⁵ «Xa wo ngaxakerenyi nde findi setare ra, fεere mu na a yi ra a baloma naxan na, a lanma wo xa a mali alo xɔɛ, a xa lu wo fe ma.

³⁶ Wo naxa riba sa a xa doni xun ma. Wo xa gaaxu Wo Marigi Ala ya ra. Wo xa wo ngaxakerenyi yigiya.

³⁷ Wo naxa riba sa a xa doni xun ma, wo naxa riba sa a xa donse sare xun ma.

³⁸ Alatala nan n na, wo Marigi Ala, naxan wo ramixi Misira bɔxi kui, n xa Kanaan bɔxi fi wo ma, n xa findi wo Marigi Ala ra.»

Mixi xun sara seriye

³⁹ «Xa wo ngaxakerenyi nde a yete mati wo ma a xa setarepa ma, wo naxa konyi wali dɔxɔ a ma.

⁴⁰ A xa lu alo wo xa walike, xa na mu a ra wo xa xɔɛ han Xɔreya Ne waxati.

⁴¹ Na temui, a tan nun a xa die xa xɔreya, e xa gbilen e xabile ma, e benbae xa bɔxi ma,

⁴² barima n ma walikee nan Isirayilakae ra, n naxee ramixi Misira bɔxi ra. A mu lanma e xa mati konyiya ra.

⁴³ Wo naxa e yamari a jaaxi ra, wo xa gaaxu wo Marigi Ala ya ra.

⁴⁴ Xa wo wama konyie xɔn, wo xa e sara si gbeteɛ tagi, naxee na wo rabilinyi. E tan nan xa findi wo xa konyie ra.

⁴⁵ Wo man nɔma konyie sarade si gbeteɛ xa mixie ya ma naxee dɔxɔxi wo tagi, a nun e xabilee mixi naxee barixi wo xa bɔxi kui. Nee nɔma findide wo xa konyie ra.

⁴⁶ Wo nɔma e lude wo xa die yi ra ke ra. E nɔma lude konyiya kui abadan, kɔnɔ

wo ngaxakerenyi Isirayilakae mu noma lude e ngaxakerenyi xa yaamari xoxoxoe bun ma.»

⁴⁷ «Xa wo ngaxakerenyi setare nde a yete mati xope bannaxi ma wo xa boxi kui, xa na mu a ra na xope xabile mixi nde ma,

⁴⁸ wo ngaxakerenyi bariboore nde noma a xun sarade.

⁴⁹ A soxo, xa na mu a ra a soxo xa di, xa na mu a ra a bariboore nde gbete, noma a xun sarade. Xa a fan feere soto, a noma a yete xun sarade.

⁵⁰ A xa na xunsare konti seriye ki ma, kelife a sara je ma, han Xoreya Ne ra. A xa na joxoe ragbilen a kanyi ma, a xa lu alo wali sare.

⁵¹ Xa je wuyaxi luxi, a xunsare xa gbo na ki a kanyi mabiri.

⁵² Xa je wuyaxi mu luxi beenu Xoreya Ne xa a li, a xunsare xa lan na je xasabi ma.

⁵³ A noma lude alo walike a kanyi xonyi, kono a mu lanma a kanyi xa a yamari a jaaxi ra.

⁵⁴ Xa a mu noma a yete xun sarade yi feere mooli yo ra, a tan nun a xa die xa lu e kanyi yi ra han Xoreya Ne ra,

⁵⁵ barima n tan nan ma walikoe na Isirayilakae ra, n naxee raminixi Misira boxi ra. Alatala nan n na, wo Marigi Ala.»

26

Barake nun Danke

¹ «Wo naxa kuye yo yailan, wo naxa ala nde rafala, wo naxa geme batu daaxi doxo, wo naxa geme masolixi batu, barima Alatala nan n na, wo Marigi Ala.

² Wo xa n ma malabui loxoεe rabatu, wo xa n ma yire seniye nxi binya. Alatala nan n na.»

³ «Xa wo n ma seriye suxu, xa wo n ma yaamarie rabatu,

⁴ n tune ragoroma ne wo be a waxati, boxi daxamui ramanima ne, sansie bogima ne xe ma.

⁵ Sansi bonbo temui buma ne han weni bogi ba temui. Weni bogi ba temui fan buma ne han sansi si temui. Wo wasama ne baloe ra, wo sabati wo xa boxi ma bojesa kui.

⁶ N hinnema wo ra alako wo xa xi bojesa kui, alako burunyi subee nun geresoe naxa wo tooro wo xonyi.

⁷ Wo noma ne wo yaxuie ra santidegema ra.

⁸ Wo xa soori suuli fama ne wo yaxui mixi keme keride. Wo xa soori keme fama wo yaxui mixi wulu fu keride. Wo fama node wo yaxuie ra gere kui.

⁹ Won birin na a ra. N di wuyaxi fima ne wo ma, n wo rawuya. N nan n ma saate rakamalima ne wo be.

¹⁰ Wo yala maale donma ne han maale xaba temui. Wo a fori bama ne a sasee kui a xa gboe ma, alako wo xa no maale neene ragatade.

¹¹ N luma ne wo seeti ma, n mu meema wo ra.

¹² N jere ma ne wo ya ma. Wo Marigi Ala nan n na, wo fan bara findi n ma jama ra.

¹³ Alatala nan n na, wo Marigi Ala, naxan wo ramini Misira boxi ra alako wo naxa lu e yi ra. N bara konyiya kote ba wo xun ma, alako wo xa jere xunnakeli kui.»

¹⁴ «Kono, xa wo mu n xui rame, xa wo mu n ma yaamarie birin nabatu,

15 xa wo mu n ma seriye suxu, xa wo mu bira n waxonfe foxo ra, xa wo n ma saate kana,

16 n yi nan nabama wo ra: N yihadi ragoroma ne wo ma, n wo rafurama ne fure jaaxi ra naxan wo yae kanama, naxan wo boje tooroma. Wo sansi xorie sima ne fufafu, barima wo yaxuie na birin donma ne.

17 N gbilenma ne wo foxo ra. Wo yaxuie noma ne wo ra, wo xonnantee wo yamarima ne. Wo luma gaaxui nan kui, wo nu wo gi hali mixi mu na wo foxo ra.»

18 «Kono na birin kui, wo mu fama n xui ramede. N wo jaxankatama han sanmaya solofere wo xa yunubie xa fe ra.

19 N wo xa yete igbona kanama ne. N koore balanma ne wo ya ra han wo xa boxi xorocho alo wure gbeeli.

20 Wo senbe jonma ne fufafu. Wo xa boxi tondima ne daxamui raminide, wo xa sansie mu bogima sonon.»

21 «Xa wo lu n matandi ra, xa wo mu n xui rame, n wo jaxankatama han sanmaya solofere wo xa yunubie xa fe ra.

22 N burunyi subee rafama ne wo xili ma. E wo xa die faxama ne, e wo xa xurusee iboo, e wo sonto han mixi jon kirae xon ma.»

23 «Na birin naba xanbi wo ra, xa wo mu tin n ma seriye ra, xa wo lu n matandi ra,

24 n fe xorochoe rafama ne wo ma, n wo jaxankata han sanmaya solofere wo xa yunubie xa fe ra.

25 N gere rakelima ne wo ma n ma saate kanaxi xa fe ra. Wo na wo noxun wo xa taa makantaxie

kui, n wo rafurama ne fure jaaxi ra, wo fa lu wo yaxuie sagoe.

²⁶ N kaame radinma wo ma temui naxe, gine fu taami ganma ne taami ganse keren kui. E na itaxun a xunxuri ra, e a xanin wo xon ma wo a don, konɔ a mu wo wasama.»

²⁷ «Na birin naba xanbi wo ra, xa wo mu wo tuli mati n na, xa wo tondi n waxɔnfe suxude,

²⁸ n fe xɔɔxɔe rafama ne wo ma, n wo jaxankata han sanmaya solofere wo xa yunubie xa fe ra.

²⁹ Wo fama wo xa die sube yati donde.

³⁰ N wo xa kuye batudee kanama ne naxee na geyae fari. N wo xa gemee rabirama ne, wo naxee batuma. N furee malanma ne wo xa kuyee fari. N wo rabejinma ne,

³¹ n wo xa taae findi gbengberenyi ra, n wo xa batudee kana, n tondi wo xa serexee suxude sonon.

³² N na ge wo xa boxi kanade, wo yaxuie yati fama kaabade na xa fe ra.

³³ N wo rayensenma ne jamanɛ gbeteɛ ma, n wo jaxankatama ne santidegema ra. Wo xa boxi kanama ne, mixi yo mu luma wo xa taae kui.»

³⁴ «Na waxati bun ma wo xa boxi malabuma ne. Wo na wo yaxuie yire temui naxe, wo xa boxi fanma ne malabui saabui ra.

³⁵ Wo xa boxi malabui sɔtɔma na waxati nan kui a mu naxan sɔtɔ wo nu na menni temui naxe.

³⁶ Naxee mu faxama na gereɛ kui, nee luma ne gaaxui kui e yaxuie yire, hali wuri burɛɛ nan din e ra, fo e e gi. E e gima ne, e bira hali santidegema kanyi yo mu na e foxɔ ra.

37 E birama ne e boore fari, alo santidegema kanyi nan e foxo ra, a fa li mixi yo mu na e foxo ra. Wo mu noma tide wo yaxuie ya ra.

38 Wo sontoma ne si gbete tagi, wo yaxuie noma ne wo ra.

39 Naxee mu faxama gere kui wo ya ma, nee fama ne faxade e yaxuie xa boxi ma e xa yunubie nun e benbae xa yunubie xa fe ra.»

40 «E fama e xa yunubie nun e benbae xa yunubie masende n be, a nun e naxan nabaxi n na matandi kui.

41 N fan e toroma ne e yaxuie xa boxi kui, alako mixi naxee e yete fixi n ma, e xa magoro. E xa e xa yunubie sare fi.

42 Na temui n nan n joxo sama ne n ma saate xon ma naxan na n tan, nun Yaxuba, Isiyaga, nun Iburahima tagi. N mu neemuma na boxi ma.

43 Boxi fama ne malabude na temui, barima Isirayilakae bara siga pon e xa yunubi sare fide. E bara n ma seriyε bejin, e bara yo n ma yaamarie ma.»

44 «Kono, n na e keru sigafe ra e yaxuie yire temui naxe, n mu e rabejinma han e xa sonto. N mu n ma saate kanama e tan ma fe ra, barima Alatala nan n na, e Marigi Ala.

45 N nan n joxo sama ne n ma saate singe xon ma, n e ramini Misira boxi ra sie ya xori temui naxe, alako n xa findi e Marigi Ala ra. Alatala nan n na.»

46 Alatala xa seriyε, a xa yaamarie, nun a xa masenyie nan na ki Alatala naxee masenxi Isirayilakae be Annabi Munsa saabui ra Turusinina geya fari.

27

Mixi naxee e yeƣe fixi Ala ma

¹ Alatala naxa a masen Annabi Munsa be,

² «A fala Isirayilakae be, xa mixi nde laayidi tongo, a xa mixi nde fi n tan Alatala ma, a noma a xun sarade yi kɔbiri xasabi nan na.

³ Xa xeme na a ra naxan xa simaya kelima je mɔxɔɔɛn han je tongo senni, a xun sarama gbeti kole tongo suuli nan na naxan maniyama yire seniyeɛxi maniyase ra.

⁴ Xa giɛ na a ra, a xun sarama gbeti kole tongo saxan nun a tagi nan na.

⁵ Xa di xeme na a ra naxan xa simaya kelima je suuli han je mɔxɔɔɛn, a xun sarama gbeti kilo mɔxɔɔɛn nan na. Xa giɛ dimedi na a ra, a xun sarama gbeti kole fu nan na.

⁶ Xa di xeme na a ra naxan mu je suuli sɔtɔxi sinden, a xun sarama gbeti kole suuli nan na. Xa di giɛ na a ra, a xun sarama gbeti kole saxan nan na.

⁷ Xa xemoxi na a ra naxan xa simaya dangima je tongo senni ra, a xun sarama gbeti kole fu nun suuli nan na. Xa jelexefori na a ra, a xun sarama gbeti kole fu nan na.

⁸ Xa setare bara na laayidi tongo, naxan mu noma na xunsare xasabi fide, a lan a xa a yeƣe masen serexedube be naxan fama xunsare xasabi falade a be a noma naxan na.»

⁹ «Xa mixi nde laayidi tongo xuruse nde fife ra, naxan noma bade serexe ra n tan Alatala be, na xuruse xa fi n tan Alatala ma. A bara seniyeɛn.

¹⁰ Xuruse gbete mu fima a masare ra, a fan ba, a mu fan ba. Xa wo na rabama, e firinyi bara findi se seniyeŋxi ra.

¹¹ Xa sube raharamuxi na a ra, naxan mu bama serexe ra n tan Alatala be, a xa xanin serexedube xon.

¹² Serexedube xa xunsare nde fala sube kepa ma. Na xa findi a sare ra.

¹³ Xa a kanyi wama na sube xun sarafe, a xa na sare fi, a man xa kobiri nde sa na fari. Na findima kobiri naxan na, a na se sare nan itaxunma doxo suuli ra, a fa doxo keren ba a ra, a na fi xunsare ra.»

¹⁴ «Xa mixi nde a xa banxi fi n tan Alatala ma, serexedube xa na sare fala banxi kepa ma. Na xa findi a sare ra.

¹⁵ Xa a kanyi wama a xun sarafe, a xa na sare fi, a man xa kobiri nde sa na fari. Na findima kobiri naxan na, a na banxi sare nan itaxunma doxo suuli ra, a fa doxo keren ba a ra, a na fi xunsare ra. Na temui banxi xa gbilen a kanyi ma.»

¹⁶ «Xa mixi nde a xa xe fi n tan Alatala ma, a sare fatanma sansi xori xasabi nan na naxan noma garansande naa. Gbeti kole tongo suuli xa fi fundenyi maniyɛ busali naani xasabi ra.

¹⁷ Xa a a xa xe fi Xoreya Ne nan kui, a sare mu masarama.

¹⁸ Xa a a xa xe fi Xoreya Ne dangi xanbi ne, serexedube xa jee konti naxee luxi beenu Xoreya Ne gbete xa fa. A xa nde ba xe sare ra na seriye kui.

¹⁹ Xa xe kanyi wama a xa xe xun sarafe, a xa na sare fi, a man xa kobiri nde sa na fari. Na findima kobiri naxan na, a na xe sare nan

itaxunma dɔxɔ suuli ra, a fa dɔxɔ keren ba a ra, a na fi xunsare ra. Na temui xe xa lu a yi ra.

²⁰ Xa a mu xe xun sara, a fa a mati mixi gbete ma, a mu noma a xun sarade sɔnɔn.

²¹ Xoreya Ne na a li, na xe kanyi neene xa keli na boxi ma. Boxi bara seniye, a bara lu alo boxi naxan natonxi. A bara findi Alatala gbe ra, serexedube xa na rawali.

²² Xa mixi bara xe saraxi fi Alatala ma, naxan mu na a xabile ke ya ma,

²³ serexedube xa a sare fala a seriye ki ma. A na kolonma ne xasabi nan ma naxee luxi beenu Xoreya Ne xa a li. Na kanyi xa a sare fi na loxo yati, barima a seniye n tan Alatala be.

²⁴ Xoreya Ne na a li, na xe gbilenma na xe kanyi singe nan ma, boore a sara naxan ma.

²⁵ Na saree birin maniyama yire seniye nxi xa se maniya ki nan ma. A kole keren lanxi garamu fu nan ma.»

²⁶ «Mixi yo mu noma a xa xuruse di singe fide n tan Alatala ma, barima a pan findixi n tan Alatala gbe nan na. Xuruse xungbe nun a lanma di singe birin findixi n tan nan gbe ra.

²⁷ Mixi noma sube raharamuxi xa di singe xun sarade. Na mixi xa a sare fi, a man xa kobiri nde sa na fari. Na findima kobiri naxan na, a na sube sare nan itaxunma dɔxɔ suuli ra, a fa dɔxɔ keren ba a ra, a na fi a xunsare ra. Xa a kanyi mu a xun sarama, a xa a mati a sare ra.»

²⁸ «Kɔnɔ se ndee na mixi naxee fima n tan Alatala ma a boje birin na e findi n gbe ra, adama mu noma nee xun sarade sɔnɔn. Nee bara seniye, nee bara findi n tan Alatala

gbansan gbe ra. Nee nɔma findide mixi, xuruse, xɛ, xa na mu a ra se gbɛtɛ ra.

²⁹ Mixi se naxee fima n tan Alatala ma na mɔoli ra, e xun mu nɔma sarade, fo e xa faxa nɛ.»

³⁰ «Bɔxi farilɛ birin findima n tan Alatala nan gbe ra, sansi xɔri naxan naminima nun wuri bili naxan bogima. Na farilɛ birin fima n tan Alatala nan ma.

³¹ Xa mixi nde wama a xa farilɛ xun sarafe, a xa a sare fi, a man xa kɔbiri nde sa na fari. Na findima kɔbiri naxan na, a na se sare nan itaxunma dɔxɔ suuli ra, a fa dɔxɔ keren ba a ra, a na fi a xunsare ra.

³² Xuruse farilɛ birin findima n tan Alatala nan gbe ra, xuruse xungbe nun a lanma, xuruse demadonyi naxan birin kɔntima. Na farilɛ birin fima n tan Alatala nan ma.

³³ Xurusee mu matoma xa a fan, xa a mu fan. Xuruse mu nɔma masarade xuruse gbɛtɛ ra, xa na mu a ra na firinyi birin seniyeɓma nɛ, e findi n tan Alatala gbe ra, e sese mu nɔma xun sarade sɔnɔn.»

³⁴ Alatala xa yaamarie nan na ki, a naxee so Annabi Munsa yi ra Turusinina geya fari Isirayilakae bɛ.

Soso Kitaabuie: Tawureta, Yabura, Inyila
The Holy Bible in the Susu language of Guinea (Soso
Kitaabuie: Tawureta, Yabura, Inyila Bible)

copyright © 2015 Mission Évangélique Réformée Néerlandaise et les
Traducteurs Pionniers de la Bible

Language: Susu

Contributor: Mission Évangélique Réformée Néerlandaise

This translation is made available to you under the terms of the Creative
Commons Attribution-Noncommercial-No Derivatives license 4.0.

You may share and redistribute this Bible translation or extracts from it
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2020-11-11

PDF generated using Haiola and XeLaTeX on 28 Dec 2024 from source
files dated 29 Jan 2022

f1d08866-ea3e-5b9b-b506-e7690c5c61d2